

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे षष्ठः प्रश्नः

Version Notes:

This is now the current Version 1.1 dated August 31, 2022.

1. This replaces the earlier version 1.0 dated Oct 31, 2021.
2. No corrections found and reported till August 15, 2022 from the date of previous version 1.0 dt 31st Oct 2021.
3. In this version we have newly added a summary of various padams at the end part of this book.
4. Required convention, style and presentation improvements or standardisations has been done wherever applicable.
5. Notify your corrections / suggestions etc to our email id vedavms@gmail.com

Previous Versions

| | | |
|-----|----------------|---------------------------|
| 1st | Version Number | 0.0 dated 31st May 2019 |
| 2nd | Version Number | 0.1 dated 31st March 2020 |
| 3rd | Version Number | 0.2 dated 30th June 2020 |
| 4th | Version Number | 0.3 dated 31st Aug 2020 |
| 5th | Version Number | 1.0 dated 30th June 2021 |
| 6th | Version Number | 1.0 dated 31st Oct 2021 |

Table of Contents

| | |
|---|---|
| 1 कृष्ण यजुर्वेदीय तैत्तिरीय संहिता पद पाठे प्रथमं काण्डं..... | 4 |
| 1.6 प्रथमकाण्डे षष्ठः प्रश्नः – याजमानकाण्डं..... | 4 |

ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

1 कृष्ण यजुर्वेदीय तैत्तिरीय संहिता पद पाठे प्रथमं

काण्डं

1.6 प्रथमकाण्डे षष्ठः प्रश्नः – याजमानकाण्डं

TS 1.6.1.1

सं त्वा॑ सिञ्चामि॑ यजु॑षा प्र॒जामा॑युर्द्धनं॑ च ।

बृह॑स्पतिप्रसूतो॑ यज॑मान इ॒ह मा रि॑षत् ॥

आज्य॑मसि सत्य॑मसि सत्य॑स्याद्ध्यक्ष॑मसि ह॒विर॑सि वैश्वा॑नरं

वै॑श्वदे॒व-मु॑त्पूतशुष्मं॑ सत्यौ॒जाः सहो॑ ऽसि

सह॑मानमसि सह॒स्वारा॑तीः सह॒स्वारा॑तीयतः सह॒स्व पृ॑तनाः

सह॒स्व पृ॑तन्यतः ।

सह॑स्रवीर्यमसि तन्मा जि॒न्वाज्य॑स्याज्य॑मसि सत्य॑स्य

सत्य॑मसि सत्या॑यु -[] 1

TS 1.6.1.1 (Padam)

समि॑ति । त्वा । सि॒ञ्चामि॑ । यजु॑षा । प्र॒जामि॑ति प्र-जाम् । आयुः॑ ।
धन॑म् । च ॥ बृह॑स्पतिप्रसू॒त इति॑ बृह॑स्पति – प्रसू॒तः । यज॑मानः ।
इह॑ । मा । रि॒षत् ॥ आ॒ज्यम् । अ॒सि । स॒त्यम् । अ॒सि । स॒त्यस्य॑ ।
अ॒ध्यक्ष॑मित्यधि – अ॒क्षम् । अ॒सि । ह॒विः । अ॒सि । वै॒श्वान॒रम् ।
वै॒श्वदे॒वमि॑ति वै॒श्व – दे॒वम् । उत्पू॑तशुष्ममित्युत्पू॑त – शुष्म॑म् ।
स॒त्यौजा॑ इति॑ स॒त्य-ओजाः॑ । स॒हः । अ॒सि । स॒हमा॑नम् । अ॒सि ।
स॒हस्व॑ । अ॒रातीः॑ । स॒हस्व॑ । अ॒राती॒यतः॑ । स॒हस्व॑ । पृ॒तनाः॑ ।
स॒हस्व॑ । पृ॒तन्य॑तः । स॒हस्र॑वीर्यमिति॑ स॒हस्र॑-विर्यम् । अ॒सि । तत् ।
मा । जि॒न्व । आ॒ज्यस्य॑ । आ॒ज्यम् । अ॒सि । स॒त्यस्य॑ । स॒त्यम् ।
अ॒सि । स॒त्यायु॑रिति॑ स॒त्य – आ॒युः । 1 (50)

TS 1.6.1.2

रसि॑ स॒त्यशु॑ष्ममसि॑ स॒त्येन॑ त्वा ऽभि॑ घा॒रयामि॑ तस्य॑ ते भक्षी॑य
पञ्च॑ानां त्वा वा॒तानां॑ य॒न्त्राय॑ ध॒र्त्राय॑ गृ॒ह्णामि॑पञ्च॑ानां त्व॒र्तूनां॑ य॒न्त्राय॑
ध॒र्त्राय॑ गृ॒ह्णामि॑पञ्च॑ानां त्वा दि॒शां य॒न्त्राय॑ ध॒र्त्राय॑ गृ॒ह्णामि॑
पञ्च॑ानां त्वा पञ्च॑ज॒नानां॑ य॒न्त्राय॑ ध॒र्त्राय॑ गृ॒ह्णामि॑च॒रोस्त्वा

पञ्च॑बिल॒स्य॒ यन्त्राय॑ ध॒त्राय॑ गृ॒ह्णामि॑ ब्र॒ह्मण॑स्त्वा तेज॒से यन्त्राय॑ ध॒त्राय॑
गृ॒ह्णामि॑ क्ष॒त्रस्य॒ त्वौज॑से यन्त्राय॑ – [] 2

TS 1.6.1.2 (Padam)

अ॒सि । स॒त्यशु॑ष्ममि॒ति स॒त्य – शु॒ष्मम् । अ॒सि । स॒त्येन॑ । त्वा ।
अ॒भीति॑ । घा॒रया॑मि । तस्य॑ । ते । भ॒क्षीय॑ । प॒ञ्चा॒नाम् । त्वा ।
वा॒ता॒नाम् । यन्त्राय॑ । ध॒त्राय॑ । गृ॒ह्णामि॑ । प॒ञ्चा॒नाम् । त्वा । ऋ॒तूना॑म् ।
यन्त्राय॑ । ध॒त्राय॑ । गृ॒ह्णामि॑ । प॒ञ्चा॒नाम् । त्वा । दि॒शाम् । यन्त्राय॑ ।
ध॒त्राय॑ । गृ॒ह्णामि॑ । प॒ञ्चा॒नाम् । त्वा । प॒ञ्च॒ज॒ना॒नामि॒ति
प॒ञ्च – ज॒ना॒नाम् । यन्त्राय॑ । ध॒त्राय॑ । गृ॒ह्णामि॑ । च॒रोः । त्वा ।
पञ्च॑बिल॒स्येति॑ प॒ञ्च – बि॒ल॒स्य । यन्त्राय॑ । ध॒त्राय॑ । गृ॒ह्णामि॑ ।
ब्र॒ह्मणः॑ । त्वा । तेज॒से । यन्त्राय॑ । ध॒त्राय॑ । गृ॒ह्णामि॑ । क्ष॒त्रस्य॑ । त्वा ।
ओज॑से । यन्त्राय॑ । 2 (50)

TS 1.6.1.3

ध॒त्राय॑ गृ॒ह्णामि॑ वि॒शे त्वा यन्त्राय॑ ध॒त्राय॑ गृ॒ह्णामि॑ सु॒वीर्या॑य त्वा गृ॒ह्णामि॑
सु॒प्रजा॑स्त्वाय त्वा गृ॒ह्णामि॑ रा॒यस्पोषा॑य त्वा गृ॒ह्णामि॑ ब्र॒ह्मव॑र्च॒साय॑ त्वा

गृ॒ह्णामि॑-भू॒र॒स्माक॑ꣳ ह॒वि॒र्दे॒वाना॑-मा॒शि॒षो यज॑मानस्य दे॒वानां॑
त्वा दे॒वता॑भ्यो गृ॒ह्णामि॑ कामाय त्वा गृ॒ह्णामि॑ ॥ 3

TS 1.6.1.3 (Padam)

ध॒र्त्राय॑ । गृ॒ह्णामि॑ । वि॒शे । त्वा । य॒न्त्राय॑ । ध॒र्त्राय॑ । गृ॒ह्णामि॑ ।
सु॒वी॒र्याये॑ति सु – वी॒र्याय॑ । त्वा । गृ॒ह्णामि॑ । सु॒प्र॒जास्त्वाये॑ति
सु॒प्र॒जाः – त्वाय॑ । त्वा । गृ॒ह्णामि॑ । रा॒यः । पो॒षाय॑ । त्वा । गृ॒ह्णामि॑ ।
ब्र॒ह्मव॑र्चसायेति ब्र॒ह्म-व॑र्चसाय । त्वा । गृ॒ह्णामि॑ । भूः । अ॒स्माक॑म् ।
ह॒विः । दे॒वाना॑म् । आ॒शि॒ष इत्या॑-शि॒षः । यज॑मानस्य । दे॒वाना॑म् ।
त्वा । दे॒वता॑भ्यः । गृ॒ह्णामि॑ । कामाय । त्वा । गृ॒ह्णामि॑ ॥ 3 (33)

(स॒त्यायु॑-रोज॑से य॒न्त्राय॑-त्रय॑स्त्रिꣳश॑च्च) (A1)

TS 1.6.2.1

ध्रु॒वो ऽसि॑ ध्रु॒वो ऽह॑ꣳ स॒जाते॑षु भू॒यासं॑ धी॒रश्चे॑त्ता
वसु॑वि॒दुग्रा॑ ऽस्यु॒ग्रा ऽह॑ꣳ स॒जाते॑षु भू॒यासमु॑ग्रश्चे॑त्ता
वसु॑वि-द॒भिभू॑रस्यभि॒भूर॑हꣳ स॒जाते॑षु भू॒यास-म॑भिभूश्चे॑त्ता
वसु॑वि॒द्युन॑ज्मि त्वा ब्र॒ह्मणा॑ दै॒व्येन॑ ह॒व्याया॑स्मै वोढ॑वे जा॒तवे॑दः ॥

इ॒न्धा॒नास्त्वा॑ सु॒प्र॒ज॒सः॑ सु॒वी॒रा ज्यो॒ग्-जी॒वे॒म ब॒लि॒ह॒तो व॒यं ते॑ ॥

य॒न्मे॑ अ॒ग्ने अ॒स्य॑ य॒ज्ञस्य॑ रि॒ष्याद् - [] 4

TS 1.6.2.1 (Padam)

ध्रु॒वः । अ॒सि॒ । ध्रु॒वः । अ॒हम् । स॒जा॒तेष्वि॒ति स - जा॒तेषु॑ ।

भू॒या॒सम् । धी॒रः । चे॒त्ता॑ । व॒सु॒वि॒दि॒ति व॒सु - वि॒त् । उ॒ग्रः । अ॒सि॒ ।

उ॒ग्रः । अ॒हम् । स॒जा॒तेष्वि॒ति स-जा॒तेषु॑ । भू॒या॒सम् । उ॒ग्रः । चे॒त्ता॑ ।

व॒सु॒वि॒दि॒ति व॒सु - वि॒त् । अ॒भि॒भू॒रि॒त्य॒भि - भूः॑ । अ॒सि॒ ।

अ॒भि॒भू॒रि॒त्य॒भि - भूः॑ । अ॒हम् । स॒जा॒तेष्वि॒ति स - जा॒तेषु॑ ।

भू॒या॒सम् । अ॒भि॒भू॒रि॒त्य॒भि - भूः॑ । चे॒त्ता॑ । व॒सु॒वि॒दि॒ति व॒सु-वि॒त् ।

यु॒न॒ज्मि॑ । त्वा॒ । ब्र॒ह्म॒णा । दै॒व्ये॑न । ह॒व्या॒य । अ॒स्मै । वो॒ढ॒वे ।

जा॒त॒वे॒द इति॑ जा॒त - वे॒दः ॥ इ॒न्धा॒नाः । त्वा॒ । सु॒प्र॒ज॒स इति॑

सु - प्र॒ज॒सः । सु॒वी॒रा इति॑ सु - वी॒राः॑ । ज्यो॒क् । जी॒वे॒म ।

ब॒लि॒ह॒त इति॑ ब॒लि - ह॒तः । व॒यम् । ते॑ ॥ यत् । मे॒ । अ॒ग्ने॒ ।

अ॒स्य॑ । य॒ज्ञस्य॑ । रि॒ष्यात् ॥ 4 (50)

TS 1.6.2.2

यद्-वा॑ स्क्न्दा॒दाज्य॑स्यो॒त वि॑ष्णो ।
तेन॑ ह॒न्मि स॒प॒त्नं॑ दु॒र्म॒रा॒यु॒मै॒नं॑ द॒धामि॑ नि॒र्ऋ॒त्या उ॒प॒स्थे॑ ॥
भूर्भु॒वस्सु॒व॒रु॒च्छु॒ष्मो॑ अ॒ग्ने य॑ज॒मा॒ना॒यै॒धि नि॑शु॒ष्मो अ॒भि॒दा॒स॒ते ।
अ॒ग्ने दे॒वे॒द्ध म॒न्वि॒द्ध म॒न्द्र॒जि॒ह्वा-म॑र्त्यस्य ते
होत॑र्मूर्द्ध॒न्ना जि॒घ॒र्मि रा॒य॒स्पोषा॑य सु॒प्र॒जा॒स्त्वा॒य सु॒वी॒र्या॑य॒मनो॑ ऽसि
प्रा॒जा॒प॒त्यं म॑न॒सा मा भू॑तेनाऽऽ वि॒श वा॑ग॒स्यै॒न्द्री
स॒प॒त्नक्ष॑यणी - [] 5

TS 1.6.2.2 (Padam)

यत् । वा । स्क्न्दा॒त् । आ॒ज्य॑स्य । उ॒त । वि॑ष्णो॒ इति॑ ॥ तेन॑ । ह॒न्मि ।
स॒प॒त्नम् । दु॒र्म॒रा॒यु॒मि॒ति दुः - म॒रा॒यु॒म् । ए॒ति । ए॒नम् । द॒धामि॑ ।
नि॒र्ऋ॒त्या इति॑ निः-ऋ॒त्याः । उ॒प॒स्थ इत्यु॒प - स्थे॑ ॥ भूः । भुवः ।
सुवः । उ॒च्छु॒ष्म इत्यु॒त् - शु॒ष्मः । अ॒ग्ने । य॑ज॒मा॒ना॒य । ए॒धि ।
नि॑शु॒ष्म इति॑ नि-शु॒ष्मः । अ॒भि॒दा॒स॒त इत्य॑भि - दा॒स॒ते ॥ अ॒ग्ने ।
दे॒वे॒द्धेति॑ दे॒व - इ॒द्ध । म॒न्वि॒द्धेति॑ म॒नु - इ॒द्ध ।
म॒न्द्र॒जि॒ह्वेति॑ म॒न्द्र-जि॒ह्व । अ॒म॒र्त्य॑स्य । ते । हो॒तः । मूर्द्ध॒न् । ए॒ति ।

जि॒घर्मि॑ । रा॒यः । पो॒षाय॑ । सु॒प्र॒जा॒स्त्वाये॑ति सु॒प्र॒जाः – त्वा॒य ।
सु॒वी॒र्याये॑ति सु – वी॒र्या॑य । मनः॑ । अ॒सि । प्रा॒जा॒प॒त्यमि॑ति
प्रा॒जा-प॒त्यम् । मन॑सा । मा । भू॒तेन॑ । ए॒ति । वि॒श । वाक् । अ॒सि ।
ऐ॒न्द्री । स॒प॒त्नक्ष॑यणीति स॒प॒त्न – क्ष॑यणी । 5 (50)

TS 1.6.2.3

वा॒चा मे॑न्द्रि॒येणाऽऽ वि॒श वस॑न्त॒मृ॒तूनां॑ प्री॒णामि॑ स मा॑ प्री॒तः प्री॑णातु
ग्री॒ष्म॒मृ॒तूनां॑ प्री॒णामि॑ स मा॑ प्री॒तः प्री॑णातु व॒र्षा ऋ॑तूनां प्री॒णामि॑ ता
मा॑ प्री॒ताः प्री॑णन्तु श॒रद॑मृ॒तूनां॑ प्री॒णामि॑ सा मा॑ प्री॒ता प्री॑णातु
हे॒म॒न्त॒शि॒शिरा॑वृ॒तूनां॑ प्री॒णामि॑ तौ मा॑ प्री॒तौ प्री॑णीता-म॒ग्नी॒षो॒मयो-र॒हं
दे॒व॒य॒ज्यया॑ चक्षु॒ष्मान् भू॒यास॑म॒ग्नेर॒हं दे॒व॒य॒ज्यया॑ ऽन्ना॒दो
भू॒यासं॑ – [] 6

TS 1.6.2.3 (Padam)

वा॒चा । मा॒ । इ॒न्द्रि॒येण॑ । ए॒ति । वि॒श । वस॑न्तम् । ऋ॒तूना॑म् ।
प्री॒णामि॑ । सः । मा॒ । प्री॒तः । प्री॑णातु । ग्री॒ष्मम् । ऋ॒तूना॑म् ।
प्री॒णामि॑ । सः । मा॒ । प्री॒तः । प्री॑णातु । व॒र्षा : । ऋ॒तूना॑म् ।
प्री॒णामि॑ । ताः । मा॒ । प्री॒ताः । प्री॑णन्तु । श॒रद॑म् । ऋ॒तूना॑म् ।

प्री॒णामि॒ । सा॒ । मा॒ । प्री॒ता । प्री॒णा॒तु ।

हे॒म॒न्त॒शि॒शि॒रा॒वि॒ति॒ हे॒म॒न्त॒ – शि॒शि॒रौ । ऋ॒तू॒ना॒म् । प्री॒णामि॒ । तौ ।

मा॒ । प्री॒तौ । प्री॒णी॒ता॒म् । अ॒ग्नी॒षो॒मयो॒रि॒त्य॒ग्नी॒ – सो॒मयोः॑ । अ॒हम् ।

दे॒व॒य॒ज्य॒ये॒ति॒ दे॒व॒ – य॒ज्य॒या॑ । चक्षु॑ष्मान् । भू॒या॒स॒म् । अ॒ग्नेः॑ ।

अ॒हम् । दे॒व॒य॒ज्य॒ये॒ति॒ दे॒व॒ – य॒ज्य॒या॑ । अ॒न्ना॒द॒ इ॒त्य॒न्न॒ – अ॒दः॑ ।

भू॒या॒स॒म् । 6 (50)

TS 1.6.2.4

द॒ब्धि॒र॒स्य॒द॒ब्धो॑ भू॒या॒स॒म॒मुं॑ द॒भे॒य॒ – म॒ग्नी॒षो॒मयो॒ – र॒हं॑

दे॒व॒य॒ज्य॒या॑ वृ॒त्र॒हा॑ भू॒या॒स॒मि॒न्द्रा॒ग्नि॒यो॒ – र॒हं॑

दे॒व॒य॒ज्य॒ये॒न्द्रि॒या॒व्य॒न्ना॒दो॑ भू॒या॒स॒मि॒न्द्र॒स्या॒हं॑

दे॒व॒य॒ज्य॒ये॒न्द्रि॒या॒वी॑ भू॒या॒सं॑ म॒हे॒न्द्र॒स्या॒हं॑

दे॒व॒य॒ज्य॒या॑ जे॒मानं॑ म॒हि॒मानं॑ ग॒मे॒य॒म॒ग्नेः॑ स्वि॒ष्ट॒कृ॒तो॒ ऽहं॑

दे॒व॒य॒ज्य॒या॑ ऽऽयु॑ष्मान्. य॒ज्ञे॒न॑ प्र॒ति॒ष्ठां॑ ग॒मे॒यं॑ ॥ 7

TS 1.6.2.4 (Padam)

द॒ब्धिः॑ । अ॒सि॒ । अ॒द॒ब्धः॑ । भू॒या॒स॒म् । अ॒मु॒म् । द॒भे॒य॒म् ।

अ॒ग्नी॒षो॒मयो॒रि॒त्य॒ग्नी॒ – सो॒मयोः॑ । अ॒हम् ।

दे॒व॒य॒ज्य॒येति॑ दे॒व – य॒ज्यया॑ । वृ॒त्र॒हेति॑ वृ॒त्र – हा । भू॒या॒सम् ।
 इ॒न्द्रा॒ग्नि॒यो॒रिती॑न्द्र – अ॒ग्नियोः॑ । अ॒हम् । दे॒व॒य॒ज्य॒येति॑
 दे॒व – य॒ज्यया॑ । इ॒न्द्रि॒या॒वी । अ॒न्ना॒द इत्य॑न्न – अ॒दः । भू॒या॒सम् ।
 इ॒न्द्र॒स्य । अ॒हम् । दे॒व॒य॒ज्य॒येति॑ दे॒व – य॒ज्यया॑ । इ॒न्द्रि॒या॒वी ।
 भू॒या॒सम् । म॒हेन्द्र॑स्येति॑ म॒हा – इ॒न्द्र॒स्य । अ॒हम् । दे॒व॒य॒ज्य॒येति॑
 दे॒व – य॒ज्यया॑ । जे॒मानम् । म॒हि॒मानम् । ग॒मे॒यम् । अ॒ग्नेः ।
 स्वि॒ष्ट॒कृत॑ इति॑ स्वि॒ष्ट – कृतः॑ । अ॒हम् ।
 दे॒व॒य॒ज्य॒येति॑ दे॒व – य॒ज्यया॑ । आ॒युष्मान् । य॒ज्ञेन॑ ।
 प्र॒तिष्ठा॑मिति॑ प्र॒ति – स्था॑म् । ग॒मे॒यम् ॥ 7 (36)

(रि॒ष्याथ्-स॒प॒न्नक्ष॑यण्य-न्ना॒दो भू॒या॒सञ्-षट्त्रिं॑शच्च) (A2)

TS 1.6.3.1

अ॒ग्नि॒र्मा दु॒रि॒ष्टात् पा॒तु स॒वि॒ता ऽघ॑श॒साद्-यो मे॑ ऽन्ति॑ दू॒रे ऽरा॑ती॒यति॑
 तमे॒तेन॑ जेष॒ सु॒रूप॑वर्षवर्ण॑ ए॒ही॒मान् भ॒द्रान् दु॒र्या अ॒भ्येहि॑
 मा॒मनु॑व्र॒ता न्यु॑ शी॒र्षाणि॑ मृ॒द्वमि॑ड ए॒ह्यदि॑त ए॒हि स॒रस्व॑त्येहि॑
 रन्ति॑र॒सि र॒मति॑र॒सि सू॒नर्य॑सि जु॒ष्टे जु॒ष्टिं ते ऽशी॑योप॒हूत॑ उप॒हवं- [] 8

TS 1.6.3.1 (Padam)

अ॒ग्निः । मा । दु॒रि॒ष्टा॒दि॒ति दुः – इ॒ष्टात् । पा॒तु । स॒वि॒ता ।
अ॒घ॒श॒ञ्सा॒दि॒त्य॒घ–श॒ञ्सात् । यः । मे । अ॒न्ति । दू॒रे । अ॒रा॒ती॒य॒ति ।
तम् । ए॒तेन॑ । जे॒षम् । सु॒रूप॑वर्षवर्ण इति सु॒रूप – वर्ष॑वर्णे ।
ए॒ति । इ॒हि । इ॒मान् । भ॒द्रान् । दु॒र्यान् । अ॒भि । ए॒ति । इ॒हि । मा॒म् ।
अ॒नु॒व्र॒ते॒त्यनु॑–व्र॒ता । नी॒ति । उ । शी॒र्षा॒णि । मृ॒द्वम् । इ॒डे । ए॒ति ।
इ॒हि । अ॒दि॒ते । ए॒ति । इ॒हि । स॒र॒स्व॒ति । ए॒ति । इ॒हि । र॒न्तिः ।
अ॒सि । र॒म॒तिः । अ॒सि । सू॒नरी॑ । अ॒सि । जु॒ष्टे । जु॒ष्टि॒म् । ते ।
अ॒शी॒य । उ॒प॒हू॒त इ॒त्युप॑ – हू॒ते । उ॒प॒ह॒व॒मि॒त्युप॑ – ह॒वम् । 8 (50)

TS 1.6.3.2

ते ऽशी॒य सा मे स॒त्या ऽऽशी॒र॒स्य य॒ज्ञस्य॑ भू॒याद॑रेडता मन॒सा
तच्छ॑केयं य॒ज्ञो दि॒वञ् रो॒हतु॑ य॒ज्ञो दि॒वं गच्छ॑तु यो दे॒व॒या॒नः
पन्था॑स्तेन य॒ज्ञो दे॒वाञ् अ॒प्यै॒त्व॒स्मास्वि॑न्द्र इन्द्रि॒यं द॑धा॒त्व॒स्मान् रा॒य
उ॒त य॒ज्ञाः स॑च॒न्ता॒म॒स्मासु॑ स॒न्त्वा॒शि॒षः सा नः॑ प्रि॒या सु॒प्र॒तू॒र्ति॒र्म॒घोनी॑
जु॒ष्टि॒र॒सि जु॒ष॒स्व नो॑ जु॒ष्टा नो॑ – [] 9

TS 1.6.3.2 (Padam)

ते । अ॒शी॒य । सा । मे । स॒त्या । आ॒शी॒रि॒त्या॑ – शीः । अ॒स्य ।
य॒ज्ञस्य॑ । भू॒यात् । अ॒रे॒डता॑ । म॒नसा॑ । तत् । श॒के॒यम् । य॒ज्ञः ।
दि॒वम् । रो॒ह॒तु । य॒ज्ञः । दि॒वम् । ग॒च्छ॒तु । यः ।
दे॒व॒या॒न इति॑ दे॒व-या॒नः । प॒न्थाः॑ । ते॒न । य॒ज्ञः । दे॒वान् । अ॒पी॒ति ।
ए॒तु । अ॒स्मा॒सु । इ॒न्द्रः । इ॒न्द्रि॒यम् । द॒धा॒तु । अ॒स्मान् । रा॒यः ।
उ॒त । य॒ज्ञाः । स॒च॒न्ता॒म् । अ॒स्मा॒सु । स॒न्तु ।
आ॒शि॒ष इ॒त्या॑ – शि॒षः । सा । नः । प्रि॒या ।
सु॒प्र॒तू॒र्ति॒रिति॑ सु – प्र॒तू॒र्तिः । म॒घो॒नी॑ । जु॒ष्टिः । अ॒सि । जु॒ष॒स्व ।
नः । जु॒ष्टा॑ । नः । ९ (50)

TS 1.6.3.3

ऽसि॑ जु॒ष्टिं ते॑ ग॒मे॒यं म॒नो ज्योति॑ जु॒षता॒माज्यं॑ वि॒च्छिन्नं॑ य॒ज्ञꣳ
स॒मि॒मं द॒धा॒तु ।
बृ॒ह॒स्पति॑-स्तनु॒तामि॒मं नो॒ विश्वे॑ दे॒वा इ॒ह मा॑दयन्तां ।
ब्र॒ध्न पि॒न्व॒स्व द॒दतो॑ मे॒ मा क्षा॑यि कु॒र्वतो॑ मे॒ मोष॑
द॒सत् प्र॒जा॒पते॑-र्भा॒गो ऽस्यूर्ज॑स्वान् प॒य॒स्वान् प्रा॑णापा॒नौ मे॑ पाहि

स॒मान॒व्या॒नौ॑ मे॑ पा॒ह्यु॒दान॒व्या॒नौ॑ मे॑ पा॒ह्य॒क्षि॒तो॒ ऽस्य॑क्षित्यै
त्वा () मा॑ मे॑ क्षे॒ष्टा अ॒मु॒त्रा॒मु॒ष्मिन् लो॒के ॥ 10

TS 1.6.3.3 (Padam)

अ॒सि॒ । जु॒ष्टि॒म् । ते॒ । ग॒मे॒य॒म् । म॒नः॑ । ज्यो॒तिः॑ । जु॒ष॒ता॒म् ।
आ॒ज्य॒म् । वि॒च्छि॒न्न॒मि॒ति वि॒ – छि॒न्न॒म् । य॒ज्ञ॒म् । स॒मि॒ति । इ॒म॒म् ।
द॒धा॒तु । बृ॒ह॒स्प॒तिः॑ । त॒नु॒ता॒म् । इ॒म॒म् । नः॑ । वि॒श्वे॑ । दे॒वाः । इ॒ह ।
मा॒द॒य॒न्ता॒म् । ब्र॒ध्न॑ । पि॒न्व॒स्व । द॒द॒तः॑ । मे॒ । मा॒ । क्षा॒यि॒ ।
कु॒र्व॒तः॑ । मे॒ । मा॒ । उ॒पे॒ति॑ । द॒स॒त् । प्र॒जा॒प॒ते॒रि॒ति प्र॒जा – प॒तेः॑ ।
भा॒गः॑ । अ॒सि॒ । ऊ॒र्ज॒स्वा॒न् । प॒य॒स्वा॒न् । प्रा॒णा॒पा॒ना॒वि॒ति॑
प्रा॒ण-अ॒पा॒नौ॑ । मे॒ । पा॒हि॒ । स॒मा॒न॒व्या॒ना॒वि॒ति॑ स॒मा॒न – व्या॒नौ॑ । मे॒ ।
पा॒हि॒ । उ॒दा॒न॒व्या॒ना॒वि॒त्यु॒दा॒न – व्या॒नौ॑ । मे॒ । पा॒हि॒ । अ॒क्षि॒तः॑ ।
अ॒सि॒ । अ॒क्षि॒त्यै॑ । त्वा () । मा॑ । मे॑ । क्षे॒ष्टाः॑ । अ॒मु॒त्र । अ॒मु॒ष्मि॒न् ।
लो॒के ॥ 10 (56) (उ॒प॒ह॒वं-जु॒ष्टा॒न-स्त्वा षट्च) (A3)

TS 1.6.4.1

ब॒र्हि॒षो॒ ऽहं॑ दे॒व॒य॒ज्य॒या॑ प्र॒जा॒वा॒न् भू॒या॒सं न॒रा॒श॒स्स॒स्या॒हं॑
दे॒व॒य॒ज्य॒या॑ प॒शु॒मा॒न् भू॒या॒स॒म॒ग्नेः॑ स्वि॒ष्ट॒कृ॒तो॒ ऽहं॑ दे॒व॒य॒ज्य॒या॑

ऽऽयुष्मान्॑ य॒ज्ञेन॑ प्र॒तिष्ठां॑ ग॒मेय॑म॒ग्नेर॒ह-मु॒ज्जि॒ति-म॒नू॒ज्जेष॑ꣳ
सोम॑स्याह-मु॒ज्जि॒ति-म॒नू॒ज्जेष॑म॒ग्नेर॒ह-मु॒ज्जि॒ति-
म॒नू॒ज्जेष॑म॒ग्नीषो॑मयो॒रह॑-मु॒ज्जि॒ति-म॒नू॒ज्जेष॑-मि॒न्द्रा॒ग्नि॒यो॒रह॑-मु॒ज्जि॒ति-
म॒नू॒ज्जेष॑-मि॒न्द्र॒स्याह॑ - [] 11

TS 1.6.4.1 (Padam)

ब॒र्हिषः॑ । अ॒हम् । दे॒वय॑ज्ययेति॑ दे॒व - य॒ज्यया॑ ॥
प्र॒जावा॒निति॑ प्र॒जा - वा॒न् । भू॒या॒सम् । न॒रा॒शꣳस॑स्य । अ॒हम् ।
दे॒वय॑ज्ययेति॑ दे॒व - य॒ज्यया॑ ॥ प॒शुमा॑निति॑ प॒शु - मा॒न् । भू॒या॒सम् ।
अ॒ग्नेः । स्वि॒ष्टकृ॑त इति॑ स्वि॒ष्ट - कृ॑तः । अ॒हम् । दे॒वय॑ज्ययेति॑
दे॒व - य॒ज्यया॑ ॥ आ॒युष्मा॑न् । य॒ज्ञेन॑ । प्र॒तिष्ठा॑मिति॑ प्र॒ति - स्था॑म् ।
ग॒मेय॑म् । अ॒ग्नेः । अ॒हम् । उ॒ज्जि॒तिमि॒त्युत् - जि॒तिम् । अ॒नु ।
उ॒दि॒ति । जे॒षम् । सोम॑स्य । अ॒हम् । उ॒ज्जि॒तिमि॒त्युत् - जि॒तिम् ।
अ॒नु । उ॒दि॒ति । जे॒षम् । अ॒ग्नेः । अ॒हम् । उ॒ज्जि॒तिमि॒त्युत्-जि॒तिम् ।
अ॒नु । उ॒दि॒ति । जे॒षम् । अ॒ग्नीषो॑मयो॒रित्य॑ग्नी - सोम॑योः । अ॒हम् ।
उ॒ज्जि॒तिमि॒त्युत् - जि॒तिम् । अ॒नु । उ॒दि॒ति । जे॒षम् ।

इन्द्रा॑ग्नियो॒रितीन्द्र॑ – अ॒ग्नियोः॑ । अ॒हम् । उज्जि॑ति॒मित्युत्-जि॒तिम् ।
अनु॑ । उदि॑ति । जे॒षम् । इन्द्र॑स्य । अ॒हम् । 11 (50)

TS 1.6.4.2

मुज्जि॑ति॒मनू॑ज्जेषं॑ महेन्द्र॑स्याह॒ मुज्जि॑ति-मनू॑ज्जेषम॒ग्नेः स्वि॑ष्टकृतो॒ ऽह
मुज्जि॑ति-मनू॑ज्जेषं॑ वा॒जस्य॑ मा प्रस॒वेनो॑द्ग्रा॒भेणो॑दग्रभीत् ।

अथा॑ स॒पत्ना॑ꣳ इन्द्रो॑ मे नि॒ग्राभे॑णाधराꣳ अ॒कः ॥

उद्ग्रा॑भं च नि॒ग्राभं॑ च ब्र॒ह्म दे॒वा अ॒वीवृ॑धन् ।

अथा॑ स॒पत्ना॑-निन्द्रा॒ग्नी मे॑ वि॒षूची॑नान् व्यस्यतां ॥

ए॒मा अ॒गम॑न्नाशि॒षो दो॑ह॒कामा॑ इन्द्र॑वन्तो – [] 12

TS 1.6.4.2 (Padam)

उज्जि॑ति॒मित्युत् – जि॒तिम् । अनु॑ । उदि॑ति । जे॒षम् । महेन्द्र॑स्येति
महा – इन्द्र॑स्य । अ॒हम् । उज्जि॑ति॒मित्युत्-जि॒तिम् । अनु॑ । उदि॑ति ।
जे॒षम् । अ॒ग्नेः । स्वि॑ष्टकृत॒ इति॑ स्विष्ट – कृतः॑ । अ॒हम् ।
उज्जि॑ति॒मित्युत् – जि॒तिम् । अनु॑ । उदि॑ति । जे॒षम् । वा॒जस्य॑ । मा ।
प्रस॒वेनेति॑ प्र – स॒वेन॑ । उद्ग्रा॑भेणेत्युत् – ग्रा॒भेण॑ । उदि॑ति ।
अग्र॑भीत् ॥ अथ॑ । स॒पत्नान्॑ । इन्द्रः॑ । मे॒ ।

नि॒ग्रा॒भे॒णेति॑ नि – ग्रा॒भे॒ण । अध॑रान् । अ॒कः ॥
उद्ग्रा॒भमि॑त्युत् – ग्रा॒भम् । च । नि॒ग्रा॒भमि॑ति नि – ग्रा॒भम् । च ।
ब्र॒ह्म । दे॒वाः । अ॒वी॒वृ॒धन् ॥ अथ॑ । स॒प॒त्नान् । इन्द्रा॒ग्नी
इतीन्द्र॑ – अ॒ग्नी । मे । वि॒षू॒ची॒नान् । वी॒ति । अ॒स्य॒ताम् ॥ ए॒ति ।
इ॒माः । अ॒ग॒मन् । आ॒शि॒ष इ॒त्या – शि॒षः । दो॒ह॒का॒मा इति॑
दो॒ह – का॒माः । इन्द्र॑वन्त इतीन्द्र॑ – वन्तः । 12 (50)

TS 1.6.4.3

वना॑महे धु॒क्षी॒महि॑ प्र॒जामि॑षं ॥
रोहि॑तेन त्वा ऽग्नि॑र्दे॒वतां॑ गम॑यतु ह॒रि॒भ्यां त्वेन्द्रो॑ दे॒वतां॑ गम॑य॒त्वेत॑शेन
त्वा सूर्यो॑ दे॒वतां॑ गम॑यतु वि ते मुञ्चामि र॒शना॑ वि र॒श्मीन् । वि
योक्त्रा॑ या॒नि प॒रि॒च॒र्त॒नानि॑ ध॒त्ताद॑स्मासु द्रवि॑णं यच्च॑ भ॒द्रं प्र णो॑
ब्रू॒ताद्-भा॒ग॒धा॒न् दे॒वता॑सु ॥
विष्णोः॑ श॒म् यो॒रहं॑ दे॒वय॑ज्यया य॒ज्ञेन॑ प्र॒तिष्ठां॑ गमे॒यꣳ सोम॑स्याहं
दे॒वय॑ज्यया – [] 13

TS 1.6.4.3 (Padam)

व॒नाम॒हे । धु॒क्षी॒महि॑ । प्र॒जामि॑ति प्र-जाम् । इ॒षम् ॥ रोहि॑तेन । त्वा ।
अ॒ग्निः । दे॒वता॑म् । ग॒मय॑तु । हरि॑भ्यामि॒ति हरि॑ – भ्याम् । त्वा ।
इन्द्रः॑ । दे॒वता॑म् । ग॒मय॑तु । ए॒त॒शेन॑ । त्वा । सूर्यः॑ । दे॒वता॑म् ।
ग॒मय॑तु । वी॒ति । ते । मु॒ञ्चामि॑ । र॒शनाः॑ । वी॒ति । र॒श्मीन् ।
वी॒ति । योक्त्रा॑ । या॒नि । प॒रिच॑र्त॒नानी॑ति परि – च॒र्त॒नानि॑ । ध॒त्तात् ।
अ॒स्मासु॑ । द्र॒विण॑म् । यत् । च । भ॒द्रम् । प्रे॒ति । नः । ब्रू॒तात् ।
भा॒गधा॑नि॒ति भा॒ग – धान् । दे॒वता॑सु ॥ वि॒ष्णोः॑ ।
श॒म्यो॑रि॒ति शं – योः । अ॒हम् । दे॒वय॑ज्ययेति दे॒व-य॑ज्यया ।
य॒ज्ञेन॑ । प्र॒तिष्ठा॑मि॒ति प्रति॑ – स्था॒म् । ग॒मेय॑म् । सोम॑स्य । अ॒हम् ।
दे॒वय॑ज्ययेति दे॒व – य॑ज्यया । 13 (50)

TS 1.6.4.4

सु॒रेता॑ रे॒तो धि॑षी॒य त्वष्टु॑र॒हं दे॒वय॑ज्यया प॒शूना॑ रूपं पु॒षेयं॑
दे॒वानां॑ प॒त्नीर॑ग्नि गृ॒हप॑ति र्य॒ज्ञस्य॑ मि॒थुनं॑ तयो॒रहं॑ दे॒वय॑ज्यया
मि॒थुने॑न प्र भू॒यासं॑ वे॒दो ऽसि॑ वि॒त्तिर॑सि वि॒देय॑ क॒र्मासि॑ क॒रुण॑मसि

क्रियास॑ स॒निर॑सि स॒निता ऽसि॑ स॒नेयं॑ घृ॒तव॑न्तं कु॒लायि॑न॒
राय॑स्पोष॑ सह॒स्रिणं॑ वे॒दो द॑दातु वा॒जिनं॑ ॥ 14

TS 1.6.4.4 (Padam)

सु॒रेता॒ इति॑ सु – रेताः॑ । रेतः॑ । धि॒षीय॑ । त्वष्टुः॑ । अ॒हम् ।
दे॒वय॑ज्ययेति॑ दे॒व-य॑ज्यया॑ । प॒शूना॑म् । रू॒पम् । पु॒षेय॑म् । दे॒वाना॑म् ।
प॒त्नीः । अ॒ग्निः । गृ॒हप॑तिरिति॑ गृ॒ह – प॑तिः । य॒ज्ञस्य॑ । मि॒थुन॑म् ।
तयोः॑ । अ॒हम् । दे॒वय॑ज्ययेति॑ दे॒व – य॑ज्यया॑ । मि॒थुने॑न । प्रेति॑ ।
भू॒यास॑म् । वे॒दः । अ॒सि । वि॒त्तिः । अ॒सि । वि॒देय॑ । क॒र्म । अ॒सि ।
क॒रुण॑म् । अ॒सि । क्रि॒यास॑म् । स॒निः । अ॒सि । स॒निता ।
अ॒सि । स॒नेय॑म् । घृ॒तव॑न्तमिति॑ घृ॒त-व॑न्तम् । कु॒लायि॑नम् । रा॒यः ।
पोष॑म् । सह॒स्रिण॑म् । वे॒दः । द॑दातु । वा॒जिन॑म् ॥ 14 (44)

(इन्द्र॑स्याह॒-मिन्द्र॑वन्तः-सोम॑स्याहं दे॒वय॑ज्यया-

चतु॑श्चत्वारि॒ंशच्च॑) (A4)

TS 1.6.5.1

आ प्या॑यतां ध्रु॒वा घृ॒तेन॑ य॒ज्ञंय॑ज्ञं प्रति॑ दे॒वय॑द्भ्यः ।
सू॒र्याया॑ ऊ॒धो ऽदि॑त्या उ॒पस्थ॑ उ॒रुधा॑रा पृ॒थि॒वी य॒ज्ञे अ॒स्मिन् ॥

प्र॒जा॒प॒ते॒र्वि॒भान्॑ नाम॑ लो॒कस्तस्मि॒॑ऽस्त्वा द॒धामि॑ सह॑ यज॒माने॑न
सद॑सि सन्मे॑ भू॒याः सर्व॑मसि॒ सर्वं॑ मे॒ भू॒याः पूर्ण॑मसि॒ पूर्णं॑ मे॒
भू॒या अक्षि॑तमसि॒ मा मे॑ क्षे॒ष्टाः प्रा॒च्यां दि॒शि दे॒वा ऋ॒त्विजो॑
मार्ज॑यन्तां दक्षि॒णायां॑ – [] 15

TS 1.6.5.1 (Padam)

ए॒ति । प्या॒य॒ताम् । ध्रु॒वा । घृ॒तेन॑ । य॒ज्ञं य॑ज्ञमि॒ति य॒ज्ञम् – य॒ज्ञम् ।
प्र॒तीति॑ । दे॒वय॑द्भ्य इति॑ दे॒वय॑त् – भ्यः॑ ॥ सू॒र्यायाः॑ । ऊ॒धः ।
अदि॑त्याः । उ॒प॒स्थ इत्यु॑प – स्थे॑ । उ॒रु॒धा॒रेत्यु॑रु – धा॒रा । पृ॒थि॒वी ।
य॒ज्ञे । अ॒स्मिन् । ॥ प्र॒जा॒प॒तेरि॑ति॒ प्र॒जा-प॒तेः । वि॒भानि॑ति॒ वि-भान्॑ ।
नाम॑ । लो॒कः । तस्मि॑न् । त्वा । द॒धामि॑ । सह॑ । यज॒माने॑न ।
सत् । अ॒सि । सत् । मे॑ । भू॒याः । सर्व॑म् । अ॒सि । सर्व॑म् । मे॑ ।
भू॒याः । पूर्ण॑म् । अ॒सि । पूर्ण॑म् । मे॑ । भू॒याः । अक्षि॑तम् । अ॒सि ।
मा । मे॑ । क्षे॒ष्टाः । प्रा॒च्याम् । दि॒शि । दे॒वाः । ऋ॒त्विजः॑ ।
मार्ज॑यन्ताम् । दक्षि॒णायाम्॑ । 15 (50)

TS 1.6.5.2

दिशि॑ मा॒साः॑ पि॒तरौ॑ मा॒र्जय॑न्तां प्र॒तीच्यां॑ दिशि॑ गृ॒हाः प॒शवो॑
मा॒र्जय॑न्तामु॒दीच्यां॑ दि॒श्याप॑ ओष॒धयो॑ वन॒स्पत॑यो मा॒र्जय॑न्तामूर्द्ध॒वायां॑
दिशि॑ य॒ज्ञः सँव॑त्सरो य॒ज्ञप॑ति मा॒र्जय॑न्तां वि॒ष्णोः॑
क्र॒मो ऽस्य॑भिमाति॒हा गा॑य॒त्रेण॑ छन्द॒सा पृ॑थि॒वीम॒नु वि क्र॑मे निर्भ॒क्तः॑
स यं द्वि॒ष्मो वि॒ष्णोः क्र॒मो ऽस्य॑भि॒शस्ति॒हा त्रै॑ष्टु॒भेन॑ छन्द॒सा
ऽन्तरि॑क्षम॒नु वि क्र॑मे निर्भ॒क्तः स यं द्वि॒ष्मो वि॒ष्णोः क्र॒मो ऽस्य॑राती॒यतो॑
हन्ता॑ जा॒गते॑न छन्द॒सा दि॒वम॒नु वि क्र॑मे निर्भ॒क्तः स यं द्वि॒ष्मो
वि॒ष्णोः क्र॒मो ऽसि॑ शत्रू॒यतो॑ हन्ता॑ ऽऽनुष्टु॒भेन॑ छन्द॒सा दि॒शो ऽनु॑
वि क्र॑मे निर्भ॒क्तः स यं द्वि॒ष्मः ॥ 16

TS 1.6.5.2 (Padam)

दिशि॑ । मा॒साः । पि॒तरः । मा॒र्जय॑न्ताम् । प्र॒तीच्याम् । दिशि॑ । गृ॒हाः ।
प॒शवः । मा॒र्जय॑न्ताम् । उ॒दीच्याम् । दिशि॑ । आ॒पः । ओष॒धयः ।
वन॒स्पत॑यः । मा॒र्जय॑न्ताम् । ऊ॒र्द्ध॒वायाम् । दिशि॑ । य॒ज्ञः । स॒म्व॑त्स॒र
इति॑ सं – व॒त्स॒रः । य॒ज्ञप॑तिरिति॑ य॒ज्ञ – प॒तिः । मा॒र्जय॑न्ताम् ।
वि॒ष्णोः । क्र॒मः । अ॒सि । अ॒भिमा॑तिहेत्य॒भिमा॑ति – हा । गा॑य॒त्रेण॑ ।

छन्दसा । पृथिवीम् । अनु । वीति । क्रमे । निर्भक्त इति
निः – भक्तः । सः । यम् । द्विष्मः । विष्णोः । क्रमः ।
असि । अभिशस्तिहेत्यभिशस्ति – हा । त्रैष्टुभेन । छन्दसा ।
अन्तरिक्षम् । अनु । वीति । क्रमे । निर्भक्त इति निः-भक्तः । सः ।
यम् । द्विष्मः । विष्णोः () । क्रमः । असि । अरातीयतः ।
हन्ता । जागतेन । छन्दसा । दिवम् । अनु । वीति । क्रमे । निर्भक्त
इति निः – भक्तः । सः । यम् । द्विष्मः । विष्णोः । क्रमः । असि ।
शत्रूयत इति शत्रु – यतः । हन्ता । आनुष्टुभेनेत्यानु – स्थुभेन ।
छन्दसा । दिशः । अनु । वीति । क्रमे । निर्भक्त इति निः – भक्तः ।
सः । यम् । द्विष्मः ॥ 16 (79)

(दक्षिणाया – मन्तरिक्षमनु वि क्रमे निर्भक्तः स यं द्विष्मो

विष्णो- रेकान्नत्रिंशच्च) (A5)

TS 1.6.6.1

अगन्म सुवः सुवरगन्म सन्दृशस्ते मा छिथिसि यत्ते तपस्तस्मै ते
मा ऽऽ वृक्षि सुभूरसि श्रेष्ठो रश्मीनामायुर्द्धा अस्यायुर्मे धेहि वर्चोधा

अ॒सि॒ व॒र्चो॑ म॒यि॒ धे॒ही॒द॒म॒ह॒म॒मुं॑ भ्रा॒तृ॒व्य॒मा॒भ्यो॑ दि॒ग्भ्यो॑ ऽस्यै॑
दि॒वो॑ ऽस्मा॒द॒न्तरि॑क्षा॒दस्यै॑ पृ॒थि॒व्या अ॒स्मा॒द॒न्नाद्या॑न्निर्भ॒जामि॑
निर्भ॒क्तः॑ स॒ यं द्वि॒ष्मः॑ ॥ 17

TS 1.6.6.1 (Padam)

अ॒ग॒न्म । सु॒वः । सु॒वः । अ॒ग॒न्म । स॒न्दृ॒श॒ इति॑ सं-दृ॒शः॑ । ते ।
मा । छि॒त्सि॒ । यत् । ते । तपः॑ । तस्मै॑ । ते । मा । ए॒ति । वृ॒क्षि॒ ।
सु॒भू॒रिति॑ सु – भूः । अ॒सि॒ । श्रेष्ठः॑ । र॒श्मी॒नाम् । आ॒यु॒र्द्धा
इ॒त्यायुः॑ – धाः । अ॒सि॒ । आ॒युः । मे । धे॒हि॒ ।
व॒र्चो॑धा इति॑ व॒र्चः – धाः । अ॒सि॒ ।
व॒र्चः । म॒यि॒ । धे॒हि॒ । इ॒दम् । अ॒हम् । अ॒मुम् । भ्रा॒तृ॒व्यम् । आ॒भ्यः ।
दि॒ग्भ्य॒ इति॑ दिक् – भ्यः । अ॒स्यै॑ । दि॒वः । अ॒स्मात् । अ॒न्तरि॑क्षात् ।
अ॒स्यै॑ । पृ॒थि॒व्याः । अ॒स्मात् । अ॒न्नाद्या॑दित्यन्न – अद्यात्॑ । नि॒रिति॑ ।
भ॒जामि॑ । निर्भ॒क्त इति॑ निः – भ॒क्तः । सः । यम् । द्वि॒ष्मः ॥ 17 (50)

TS 1.6.6.2

सं ज्योति॑षा ऽभू॒वमै॒न्द्री-मा॒वृ॒त-म॒न्वाव॑र्ते॒ सम॒हं प्र॒जया॑ सं मया॑
प्र॒जा सम॒हं रा॒यस्पो॑षेण॒ सं मया॑ रा॒यस्पो॑षः॒ समि॑द्धो अ॒ग्ने मे॑

दी॒दि॒हि॒ स॒मे॒द्वा॒ ते॒ अ॒ग्ने॒ दी॒द्या॒सं॒ व॒सु॒मा॒न् य॒ज्ञो॒ व॒सी॒या॒न्

भू॒या॒स॒म॒ग्न॒ आ॒यू॒षि॒ प॒व॒स आ॒ सु॒वो॒र्ज॒मि॒षं च॒ नः ।

आ॒रे बा॒ध॒स्व दु॒च्छु॒नां ॥

अ॒ग्ने प॒व॒स्व स्व॒पा अ॒स्मे वर्चः॑ सु॒वी॒र्यं॑ । 18

TS 1.6.6.2 (Padam)

स॒मि॒ति । ज्यो॒ति॒षा । अ॒भू॒व॒म् । ऐ॒न्द्री॒म् । आ॒वृ॒त॒मि॒त्या॑ – वृ॒त॒म् ।

अ॒न्वा॒व॒र्त॒ इत्य॑नु – आ॒व॒र्ते॑ । स॒मि॒ति । अ॒ह॒म् । प्र॒ज॒ये॒ति प्र॒-ज॒या॑ ।

स॒मि॒ति । म॒या॑ । प्र॒जे॒ति प्र॒ – जा॑ । स॒मि॒ति । अ॒ह॒म् । रा॒यः॑ ।

पो॒षे॒ण । स॒मि॒ति । म॒या॑ । रा॒यः॑ । पो॒षः॑ । स॒मि॒द्ध इति॑ स॒म् – इ॒द्धः॑ ।

अ॒ग्ने । मे॒ । दी॒दि॒हि । स॒मे॒द्धे॒ति स॒म् – ए॒द्धा । ते॒ । अ॒ग्ने॒ ।

दी॒द्या॒स॒म् । व॒सु॒मा॒नि॒ति व॒सु – मा॒न् । य॒ज्ञः॑ । व॒सी॒या॒न् । भू॒या॒स॒म् ।

अ॒ग्ने॑ । आ॒यू॒षि॒ प॒व॒से॒ । ए॒ति॑ । सु॒व॒ । ऊ॒र्ज॒म् । इ॒ष॒म् । च॒ ।

नः॑ ॥ आ॒रे । बा॒ध॒स्व । दु॒च्छु॒ना॒म् ॥ अ॒ग्ने॑ । प॒व॒स्व । स्व॒पा इति॑

सु॒-अ॒पाः॑ । अ॒स्मे इति॑ । वर्चः॑ । सु॒वी॒र्य॒मि॒ति सु॒-वी॒र्य॒म् ॥ 18 (50)

TS 1.6.6.3

दध॑त्पोष॑ꣳ रयि॑ं मयि॑ ।

अग्ने॑ गृह॑पते सुगृह॑पति॒रहं॑ त्वया॑ गृह॑पति॒ना भूया॑सꣳ सुगृह॑पति॒र्मया॑
त्वं गृह॑पति॒ना भूयाः॑ शत॑ꣳ हिमा॑-स्तामा॒शिष॑मा शा॑से तन्त॑वे
ज्योति॑ष्मतीं॒ तामा॑शिष॒मा शा॑से ऽमु॒ष्मै ज्योति॑ष्मतीं॒ कस्त्वा॑ युनक्ति॒
स त्वा॑ वि मुञ्च॑त्वग्ने॑ व्रत॑पते व्रत॑मचारि॒षं तद॑शकं॒ तन्मे॑ ऽराधि॒ यज्ञो॑
बभू॑व स आ -[] 19

TS 1.6.6.3 (Padam)

दध॑त् । पोष॑म् । रयि॑म् । मयि॑ ॥ अग्ने॑ । गृह॑पत॒ इति॑ गृह॑ - प॒ते ।
सुगृह॑पति॒रिति॑ सु - गृह॑पतिः॑ । अ॒हम् । त्वया॑ ।
गृह॑पति॒नेति॑ गृह॑ - पति॒ना । भूया॑सम् । सुगृह॑पति॒रिति॑
सु - गृह॑पतिः॑ । मया॑ । त्वम् । गृह॑पति॒नेति॑ गृह॑ - पति॒ना । भूयाः॑ ।
शत॑म् । हिमाः॑ । ताम् । आशिष॑मित्या॒ - शिष॑म् । एति॑ । शा॑से ।
तन्त॑वे । ज्योति॑ष्मतीम् । ताम् । आशिष॑मित्या॒ - शिष॑म् । एति॑ ।
शा॑से । अ॒मुष्मै॑ । ज्योति॑ष्मतीम् । कः । त्वा॑ । युनक्ति॑ । सः । त्वा॑ ।
वीति॑ । मुञ्च॑तु । अग्ने॑ । व्रत॑पत॒ इति॑ व्रत॑ - प॒ते । व्रत॑म् ।

अ॒चा॒रि॒षम् । तत् । अ॒श॒क॒म् । तत् । मे । अ॒रा॒धि । य॒ज्ञः ।

ब॒भू॒व । सः । ए॒ति । 19 (50)

TS 1.6.6.4

ब॒भू॒व स प्र ज॒ज्ञे स वा॒वृ॒धे ।

स दे॒वाना॒मधि॑पति॒र्ब॒भू॒व सो अ॒स्मा॒ अ॒धि॑पतीन् करोतु वय॑
स्या॒म प॒तयो॑ रयी॒णां ॥

गो॒मा॒ अ॒ग्ने ऽवि॑मा॒ अ॒श्वी य॒ज्ञो नृ॒व॒त्स॒खा स॒द॒मि॒द॒प्र॒मृ॒ष्यः ।

इ॒डा॒वा॒ ए॒षो अ॒सुर॑ प्र॒जा॒वा॒न् दी॒र्घो र॒यिः पृ॒थु॒बु॒ध्नः स॒भा॒वा॒न् ॥ 20

TS 1.6.6.4 (Padam)

ब॒भू॒व । सः । प्रे॒ति । ज॒ज्ञे । सः । वा॒वृ॒धे ॥ सः । दे॒वाना॑म् ।

अ॒धि॑पति॒रित्य॑धि – प॒तिः । ब॒भू॒व । सः । अ॒स्मा॒न् ।

अ॒धि॑पती॒नित्य॑धि – प॒तीन् । क॒रो॒तु । व॒यम् । स्या॒म । प॒तयः॑ ।

रयी॒णाम् ॥ गो॒मा॒नि॒ति गो – मा॒न् । अ॒ग्ने । अ॒वि॑मा॒नित्य॑वि – मा॒न् ।

अ॒श्वी । य॒ज्ञः । नृ॒व॒त्स॒खेति॑ नृ॒वत् – स॒खा । स॒दम् । इत् ।

अ॒प्र॒मृ॒ष्य इत्य॑प्र – मृ॒ष्यः ॥ इ॒डा॒वा॒नि॒ती॒डा – वा॒न् । ए॒षः । अ॒सुर॑ ।

प्र॒जा॒वा॒नि॒ति॒ प्र॒जा – वा॒न् । दी॒र्घः । र॒यिः । पृ॒थु॒बु॒ध्न इति॑
पृ॒थु – बु॒ध्नः । स॒भा॒वा॒नि॒ति॒ स॒भा – वा॒न् ॥ 20 (35)

(द्विष्मः-सुवीर्यꣳ-स आ-पञ्चत्रिंशच्च) (A6)

TS 1.6.7.1

यथा॑ वै स॒मृत॑सो॒मा ए॒वं वा॑ ए॒ते स॒मृत॑य॒ज्ञा यद्-दर्॑.शपूर्णमा॒सौ
कस्य॑ वा अ॒ह दे॒वा य॒ज्ञमा॒गच्छ॑न्ति॒ कस्य॑ वा न ब॒हूनां॑
य॒जमा॑नानां॒ यो वै दे॒वताः॒ पूर्॒वः परि॑गृह्णाति॒ स ए॒नाः श्वो॑
भू॒ते य॒जत॑ ए॒तद्-वै दे॒वाना॑मा॒यत॑नं॒ यदा॑हवनीयो॒ ऽन्तरा॑ ऽग्नी
प॒शूनां॑ गा॒र्हप॑त्यो म॒नुष्या॑णा-म॒न्वाहा॑र्यप॒चनः॑

पि॒तृणा॑म॒ग्निं गृ॑ह्णाति॒ स्व ए॒वाय॑तने॒ दे॒वताः॒ परि – [] 21

TS 1.6.7.1 (Padam)

यथा॑ । वै । स॒मृत॑सो॒मा इति॑ स॒मृत – सो॒माः । ए॒वम् । वै । ए॒ते ।
स॒मृत॑य॒ज्ञा इति॑ स॒मृत – य॒ज्ञाः । यत् । दर्॑.शपूर्णमा॒सावि॑ति
दर्॑.श – पूर्णमा॒सौ । कस्य॑ । वा । अ॒ह । दे॒वाः । य॒ज्ञम् ।
आ॒गच्छ॑न्तीत्या॒ – गच्छ॑न्ति । कस्य॑ । वा । न । ब॒हूना॑म् ।
य॒जमा॑नाना॒म् । यः । वै । दे॒वताः॒ । पूर्॒वः ।

परि॑गृ॒ह्णातीति॑ परि – गृ॒ह्णाति॑ । सः । ए॒नाः । श्वः । भू॒ते । य॒ज॒ते ।
ए॒तत् । वै । दे॒वाना॑म् । आ॒य॒त॒न॒मि॒त्या – य॒त॒न॒म् । यत् ।
आ॒ह॒व॒नी॒य इ॒त्या – ह॒व॒नी॒यः । अ॒न्त॒रा । अ॒ग्नी इति॑ । प॒शूना॑म् ।
गा॒र्ह॒प॒त्य इति॑ गा॒र्ह – प॒त्यः । म॒नु॒ष्या॑णाम् । अ॒न्वा॒हा॒र्य॒प॒च॒न
इ॒त्य॒न्वा॒हा॒र्य – प॒च॒नः । पि॒तृ॑णाम् । अ॒ग्नि॒म् । गृ॒ह्णा॒ति । स्वे । ए॒व ।
आ॒य॒त॒न इ॒त्या – य॒त॒ने । दे॒वताः॑ । प॒री॒ति । 21 (50)

TS 1.6.7.2

गृ॒ह्णा॒ति ताः॑ श्वो भू॒ते य॒ज॒ते व्र॒तेन॑ वै मे॒द्ध्यो ऽग्नि॑ व्र॒त॒प॒ति ब्रा॒ह्म॒णो
व्र॒त॒भृद्-व्र॒त॒मु॒पै॒ष्यन् ब्रू॒याद॒ग्ने व्र॒त॒प॒ते व्र॒तं च॑रिष्यामीत्य॒ग्निर्वै
दे॒वानां॑ व्र॒त॒प॒ति-स्त॒स्मा ए॒व प्र॒तिप्रो॑च्य व्र॒त॒मा ल॑भते ब॒र्हिषा॑
पू॒र्ण॒मा॒से व्र॒त॒मु॒पै॒ति व॒थ्सै-र॒मावा॑स्या-या॒मे॒त॒द्ध्येत॑यो-
रा॒य॒त॒न॒मु॒प॒स्ती॒र्यः पू॒र्वश्चा॒ग्निर॒प॒रश्चे॒त्याहु॑ र्म॒नु॒ष्या – [] 22

TS 1.6.7.2 (Padam)

गृ॒ह्णा॒ति । ताः । श्वः । भू॒ते । य॒ज॒ते । व्र॒तेन॑ । वै । मे॒द्ध्यः । अ॒ग्निः ।
व्र॒त॒प॒ति॒रिति॑ व्र॒त – प॒तिः । ब्रा॒ह्म॒णः । व्र॒त॒भृ॒दिति॑ व्र॒त – भृ॒त् ।
व्र॒त॒म् । उ॒पै॒ष्यन्नि॒त्युप॑ – ए॒ष्यन् । ब्रू॒यात् । अ॒ग्ने ।

व्रत॑प॒त इति॑ व्रत॑ – प॒ते । व्रत॑म् । च॒रि॒ष्या॒मि । इति॑ । अ॒ग्निः । वै ।
 दे॒वाना॑म् । व्रत॑प॒तिरिति॑ व्रत॑ – प॒तिः । तस्मै॑ । ए॒व ।
 प्र॒तिप्रो॑च्येति॑ प्र॒ति – प्रो॑च्य । व्रत॑म् । एति॑ । ल॒भ॒ते । ब॒र्हिषा॑ ।
 पूर्ण॑मा॒स इति॑ पूर्ण॑ – मा॒से । व्रत॑म् । उ॒पेति॑ । एति॑ । व॒थ्सैः ।
 अ॒मावा॑स्याया॒मित्य॑मा – वा॒स्याया॑म् । ए॒तत् । हि । ए॒तयोः॑ ।
 आ॒य॒त॒न॒मित्या॑ – य॒त॒न॒म् । उ॒प॒स्तीर्य॑ इत्यु॒प – स्तीर्यः॑ । पूर्॒वः । च ।
 अ॒ग्निः । अ॒परः । च । इति॑ । आ॒हुः । म॒नुष्याः॑ । 22 (50)

TS 1.6.7.3

इन् न्वा॑ उ॒प॒स्तीर्ण॑-मि॒च्छन्ति॑ कि॒मु दे॒वा येषां॑ न॒वाव॑सान-
 मु॒पास्मि॑ञ्छ्वो यक्ष्य॑माणे दे॒वता॑ व॒सन्ति॑ य ए॒वं वि॒द्वान॒ग्नि-मु॒प॒स्तृणा॑ति
 यज॑मानेन॒ ग्राम्या॑श्च प॒शवो॑ ऽव॒रुद्ध्या॑ आ॒रण्या॑श्चेत्याहु॒र्यद्
 ग्राम्या॑नु॒प॒व॒सति॑ तेन॒ ग्राम्या॑न॒व रु॒न्धे यदा॑र॒ण्यस्या॑श्जाति॒ तेना॑र॒ण्यान् ।
 यद॒नाश्चानु॑प॒व॒सेत् पित॑रु॒दे॒वत्यः॑ स्यादा॒र॒ण्यस्या॑श्जातीन्द्रि॒यं – [] 23

TS 1.6.7.3 (Padam)

इत् । नु । वा । उ॒प॒स्तीर्ण॑मि॒युप – स्तीर्ण॑म् । इ॒च्छन्ति॑ । किम् ।
 उ । दे॒वाः । येषा॑म् । न॒वाव॑सान॒मिति॑ न॒व – अ॒व॒सान॑म् । उ॒पेति॑ ।

अ॒स्मिन् । श्वः । य॒क्ष्य॑माणे । दे॒वताः॑ । व॒स॒न्ति॑ । यः । ए॒वम् ।
वि॒द्वान् । अ॒ग्निम् । उ॒प॒स्तृ॑णातीत्युप – स्तृ॑णाति । यज॑मानेन ।
ग्रा॒म्याः । च । प॒शवः॑ । अ॒वरु॑द्ध्या इत्यव॑-रुद्ध्याः॑ । आ॒र॒ण्याः ।
च । इति॑ । आ॒हुः । यत् । ग्रा॒म्यान् । उ॒प॒व॒स॒तीत्यु॑प – व॒स॒ति॑ ।
तेन॑ । ग्रा॒म्यान् । अ॒वेति॑ । रु॒न्धे । यत् । आ॒र॒ण्य॒स्य । अ॒ज्ञाति॑ ।
तेन॑ । आ॒र॒ण्यान् । यत् । अ॒ना॒श्वा॒न् । उ॒प॒व॒से॒दित्यु॑प – व॒सेत् ।
पि॒तृ॒दे॒व॒त्य इति॑ पि॒तृ – दे॒व॒त्यः । स्यात् । आ॒र॒ण्य॒स्य । अ॒ज्ञाति॑ ।

इन्द्रि॒यम् । 23 (50)

TS 1.6.7.4

वा आ॒र॒ण्य॒मिन्द्रि॒यमे॒वाऽऽत्म॑न् ध॒त्ते यद॑ना॒श्वा॒नु॒प॒व॒सेत् क्षो॑धुकः
स्याद्-यद॑ज्ञी॒याद्-रु॒द्रो ऽस्य॑ प॒शू॒न॒भि म॑न्येतापो ऽज्ञाति॑
तन्ने॒वा॒शितं॑ ने॒वा ऽन॑शितं न क्षो॑धुको भवति ना॒स्य रु॒द्रः प॒शू॒न॒भि
म॑न्यते वज्रो॒ वै य॒ज्ञः क्षु॑त्खलु॒ वै म॑नुष्यस्य भ्रातृ॒व्यो
यद॑ना॒श्वा॒नु॒प॒व॒स॒ति वज्रै॑णैव सा॒क्षात् () क्षु॑धं भ्रातृ॒व्यं ह॑न्ति ॥ 24

TS 1.6.7.4 (Padam)

वै । आ॒र॒ण्य॒म् । इ॒न्द्रि॒य॒म् । ए॒व । आ॒त्म॒न् । ध॒त्ते । यत् । अ॒ना॒श्वा॒न् ।
उ॒प॒व॒से॒दि॒त्यु॒प – व॒से॒त् । क्षो॒धु॒कः । स्या॒त् । यत् । अ॒श्नी॒या॒त् ।
रु॒द्रः । अ॒स्य । प॒शून् । अ॒भी॒ति॒ । म॒न्ये॒त । अ॒पः । अ॒श्ना॒ति॒ । तत् ।
न । इ॒व । अ॒शि॒त॒म् । न । इ॒व । अ॒न॒शि॒त॒म् । न । क्षो॒धु॒कः ।
भ॒व॒ति॒ । न । अ॒स्य । रु॒द्रः । प॒शून् । अ॒भी॒ति॒ । म॒न्य॒ते॒ । व॒ज्रः॑ । वै ।
य॒ज्ञः । क्षु॒त् । ख॒लु । वै । म॒नु॒ष्य॒स्य॑ । भ्रा॒तृ॒व्यः॑ । यत् । अ॒ना॒श्वा॒न् ।
उ॒प॒व॒स॒ती॒त्यु॒प – व॒स॒ति॒ । व॒ज्रे॒ण । ए॒व । सा॒क्षा॒दि॒ति॒ स – अ॒क्षा॒त् () ।
क्षु॒ध॒म् । भ्रा॒तृ॒व्य॒म् । ह॒न्ति॒ ॥ 24 (53)

(परि॑-म॒नु॒ष्या॑-इ॒न्द्रि॒य॒-सा॒क्षा॒त्-त्री॒णि च) (A7)

TS 1.6.8.1

यो वै श्र॒द्धा॒म॒ना॒र॒भ्य॒ य॒ज्ञे॒न॒ य॒ज॒ते॒ ना॒स्ये॒ष्टाय॒ श्रद्-द॑ध॒ते ऽपः॑ प्र ण॒य॒ति॒
श्र॒द्धा॒ वा आ॒पः॑ श्र॒द्धा॒मे॒वा॒ऽऽर॒भ्य॒ य॒ज्ञे॒न॒ य॒ज॒त॒ उ॒भयै॑ ऽस्य॒ दे॒व॒म॒नु॒ष्या॑
इ॒ष्टाय॒ श्रद्द॑ध॒ते॒ तदा॑ह॒र॒ति॒ वा ए॒ता व॒र्त्रं॑ ने॒द॒न्त्य॒ति॒ वाचं॑ म॒नो वा॒वैता॑
ना॒ति॒ ने॒द॒न्ती॒ति॒ म॒न॒सा॒ प्र ण॒य॒ती॒यं वै॑ म॒नो – [] 25

TS 1.6.8.1 (Padam)

यः । वै । श्रद्धामिति श्रत् – धाम् । अनारभ्येत्यना – रभ्य । यज्ञेन ।
यजते । न । अस्य । इष्टाय । श्रत् । दधते । अपः । प्रेति । नयति ।
श्रद्धेति श्रत् – धा । वै । आपः । श्रद्धामिति श्रत् – धाम् । एव ।
आरभ्येत्या – रभ्य । यज्ञेन । यजते । उभयै । अस्य ।
देवमनुष्या इति देव – मनुष्याः । इष्टाय । श्रत् । दधते । तत् ।
आहुः । अतीति । वै । एताः । वर्त्रम् । नेदन्ति । अतीति । वाचम् ।
मनः । वाव । एताः । न । अतीति । नेदन्ति । इति । मनसा । प्रेति ।
नयति । इयम् । वै । मनः । 25 (50)

TS 1.6.8.2

ऽनयैवैनाः प्र णयत्य-स्कन्नहवि भवति य एवं वेद
यज्ञायुधानि सं भरति यज्ञो वै यज्ञायुधानि यज्ञमेव तत्सं भरति
यदेकमेकं संभरेत् पितृदेवत्यानि स्युर्यथ सह सर्वाणि मानुषाणि
द्वे द्वे सं भरति याज्यानुवाक्ययोरेव रूपं करोत्यथो मिथुनमेव यो वै
दश यज्ञायुधानि वेद मुखतो ऽस्य यज्ञः कल्पते स्प्य – [] 26

TS 1.6.8.2 (Padam)

अ॒नया॑ । ए॒व । ए॒नाः । प्रे॒ति । न॒यति॑ ।
अ॒स्क॒न्न॒ह॒वि॒रि॒त्य॒स्क॒न्न – ह॒विः । भ॒वति॑ । यः । ए॒वम् । वे॒द ।
य॒ज्ञायु॑धानीति य॒ज्ञ – आ॒यु॒धानि॑ । स॒मिति॑ । भ॒रति॑ । य॒ज्ञः । वै ।
य॒ज्ञायु॑धानीति य॒ज्ञ – आ॒यु॒धानि॑ । य॒ज्ञम् । ए॒व । तत् । स॒मिति॑ ।
भ॒रति॑ । यत् । ए॒कमे॒क॒मित्ये॒कम् – ए॒कम् । सं॒भरे॒दिति॑ सं॒भरे॑त् ।
पि॒तृदे॒वत्या॑नीति पि॒तृ – दे॒वत्या॑नि । स्युः । यत् । स॒ह । सर्वा॑णि ।
मा॒नुषा॑णि । द्वे॒द्वे इति॑ द्वे – द्वे । स॒मिति॑ । भ॒रति॑ ।
या॒ज्यानु॑वाक्ययो॒रिति॑ या॒ज्या – अनु॑वाक्ययोः । ए॒व । रू॒पम् ।
क॒रोति॑ । अथो॒ इति॑ । मि॒थु॒नम् । ए॒व । यः । वै । द॒श ।
य॒ज्ञायु॑धानीति य॒ज्ञ – आ॒यु॒धानि॑ । वे॒द । मु॒खतः॑ ।
अ॒स्य । य॒ज्ञः । क॒ल्पते॑ । स्फ्यः । 26 (50)

TS 1.6.8.3

श्च॑ क॒पाला॑नि चा॒ग्नि॒हो॒त्र॒ह॒वणी॑ च॒ शूर्पं॑ च॒ कृ॒ष्णा॒जिनं॑ च॒ श॒म्या॑
चो॒लू॒खलं॑ च॒ मु॒सलं॑ च॒ दृ॒ष॒च्चो॒प॒ला॑ चै॒तानि॑ वै द॒श
य॒ज्ञायु॑धानि॒ य ए॒वं वे॒द मु॒खतो॑ ऽस्य॒ य॒ज्ञः क॒ल्पते॑ यो वै दे॒वेभ्यः॑

प्रति॑प्रोच्य॑ य॒ज्ञेन॑ यज॑ते जु॒षन्ते॑ ऽस्य॑ दे॒वा ह॒व्यं ह॒विर्नि॑रुप्यमा॒णम॒भि
मन्त्र॑येता॒ग्निं हो॑तारमि॒ह तं हु॑व इति-[] 27

TS 1.6.8.3 (Padam)

च । क॒पाला॑नि । च । अ॒ग्निहो॑त्रहव॒णीत्य॑ग्निहोत्र – ह॒वनी । च ।
शूर्प॑म् । च । कृ॒ष्णाजि॑नमि॒ति कृ॒ष्ण – अ॒जिन॑म् । च । श॒म्या । च ।
उ॒लूख॑लम् । च । मु॒सल॑म् । च । दृ॒षत् । च । उ॒पला । च ।
ए॒तानि॑ । वै । द॒श । य॒ज्ञायु॑धानीति॑ य॒ज्ञ – आ॒युधा॑नि । यः । ए॒वम् ।
वेद॑ । मु॒खतः॑ । अ॒स्य । य॒ज्ञः । क॒ल्प॑ते । यः । वै । दे॒वेभ्यः॑ ।
प्रति॑प्रोच्येति॑ प्रति – प्रोच्य॑ । य॒ज्ञेन॑ । यज॑ते । जु॒षन्ते॑ । अ॒स्य ।
दे॒वाः । ह॒व्यम् । ह॒विः । नि॒रुप्य॑मा॒णमि॒ति निः – उ॒प्यमा॑नम् ।
अ॒भीति॑ । मन्त्र॑येत । अ॒ग्निम् । हो॑तारम् । इ॒ह । तम् ।

हु॒वे । इति॑ । 27 (50)

TS 1.6.8.4

दे॒वेभ्य॑ ए॒व प्रति॑प्रोच्य॑ य॒ज्ञेन॑ यज॑ते जु॒षन्ते॑ ऽस्य॑ दे॒वा ह॒व्यमे॒ष
वै य॒ज्ञस्य॑ ग्र॒हो गृ॑हीत्वै॒व य॒ज्ञेन॑ यज॑ते तदु॑दि॒त्वा वाचं॑ यच्छति॑
य॒ज्ञस्य॑ धृ॒त्या अथो॑ मन॒सा वै प्र॒जाप॑ति॒र्य॒ज्ञमत॑नु॒त मन॑सै॒व तद्

य॒ज्ञं त॑नु॒ते र॒क्षसा॑-म॒नन्व॑व॒चारा॑य॒ यो वै य॒ज्ञं यो॑ग॒ आग॑ते यु॒नक्ति॑
यु॒ङ्क्ते यु॒ञ्जाने॑षु क॒स्त्वा यु॒नक्ति॑ स त्वा यु॒नक्ति॑- ()-त्या॒ह
प्र॒जाप॑तिर्वै कः प्र॒जाप॑तिनै॒वैनं॑ यु॒नक्ति॑ यु॒ङ्क्ते यु॒ञ्जाने॑षु ॥ 28

TS 1.6.8.4 (Padam)

दे॒वेभ्यः॑ । ए॒व । प्र॒तिप्रो॑च्येति॒ प्रति॑ - प्रोच्य॑ । य॒ज्ञेन॑ । य॒जते॑ ।
जु॒षन्ते॑ । अ॒स्य । दे॒वाः । ह॒व्यम् । ए॒षः । वै । य॒ज्ञस्य॑ । ग्र॒हः ।
गृ॒हीत्वा । ए॒व । य॒ज्ञेन॑ । य॒जते॑ । तत् । उ॒दित्वा॑ । वाच॑म् । य॒च्छति॑ ।
य॒ज्ञस्य॑ । धृ॒त्यै । अथो॑ इति॑ । म॒नसा॑ । वै ।
प्र॒जाप॑तिरिति॒ प्रजा॑ - प॒तिः । य॒ज्ञम् । अ॒तनु॑त । म॒नसा॑ । ए॒व ।
तत् । य॒ज्ञम् । त॑नु॒ते । र॒क्षसाम् । अ॒नन्व॑व॒चारा॑येत्य॒ननु॑-अ॒वचा॑राय ।
यः । वै । य॒ज्ञम् । यो॒गे । आ॒गत॑ इत्या - ग॒ते । यु॒नक्ति॑ । यु॒ङ्क्ते ।
यु॒ञ्जाने॑षु । कः । त्वा । यु॒नक्ति॑ । सः । त्वा । यु॒नक्तु॑ () । इति॑ ।
आ॒ह । प्र॒जाप॑तिरिति॒ प्रजा॑ - प॒तिः । वै । कः । प्र॒जाप॑तिनेति॑
प्रजा॑ - प॒तिना॑ । ए॒व । ए॒नम् । यु॒नक्ति॑ । यु॒ङ्क्ते ।
यु॒ञ्जाने॑षु ॥ 28 (61) (वैम॒नः-स्फ्य॑-इति॑-यु॒नक्त्वे॑-का॒दश॑ च)

(A8)

TS 1.6.9.1

प्र॒जा॒प॒ति॒ र्य॒ज्ञा॒-न॒सृ॒ज॒ता॒ग्नि॒हो॒त्रं॑ चा॒ग्नि॒ष्टो॒मं॑ च॒ पौ॒र्ण॒मा॒सीं॑ चो॒क्थ्यं॑
चा॒मा॒वा॒स्यां॑ चा॒ति॒रा॒त्रं॑ च॒ ता॒नु॒द॒मि॒मी॒त॒ या॒व॒द॒ग्नि॒हो॒त्र-मा॒सी॒त्
ता॒वा॒न॒ग्नि॒ष्टो॒मो॒ या॒व॒ती॒ पौ॒र्ण॒मा॒सी॒ ता॒वा॒नु॒क्थ्यो॒ या॒व॒त्य॒मा॒वा॒स्या
ता॒वा॒न॒ति॒रा॒त्रो॒ य॒ ए॒वं॑ वि॒द्वान॒ग्नि॒हो॒त्रं॑ जु॒हो॒ति॒ या॒व॒द॒ग्नि॒ष्टो॒मे॒नो॒पा॒प्नो॒ति॒
ता॒व॒दु॒पा॒ऽऽप्नो॒ति॒ य॒ ए॒वं॑ वि॒द्वान् पौ॒र्ण॒मा॒सीं॑ य॒ज॒ते॒
या॒व॒दु॒क्थ्ये॒नो॒पा॒ऽऽप्नो॒ति॒ - [] 29

TS 1.6.9.1 (Padam)

प्र॒जा॒प॒ति॒रि॒ति॒ प्र॒जा॒ - प॒तिः॑ । य॒ज्ञान् । अ॒सृ॒ज॒त॒ ।
अ॒ग्नि॒हो॒त्र॒मि॒त्य॒ग्नि॒ - हो॒त्रम् । च॒ । अ॒ग्नि॒ष्टो॒म॒मि॒त्य॒ग्नि॒ - स्तो॒मम् ।
च॒ । पौ॒र्ण॒मा॒सी॒मि॒ति॒ पौ॒र्ण॒ - मा॒सीम् । च॒ । उ॒क्थ्यम् । च॒ ।
अ॒मा॒वा॒स्या॒मि॒त्य॒मा॒-वा॒स्याम् । च॒ । अ॒ति॒रा॒त्र॒मि॒त्य॒ति॒ - रा॒त्रम् । च॒ ।
ता॒न् । उ॒दि॒ति॒ । अ॒मि॒मी॒त॒ । या॒व॒त् । अ॒ग्नि॒हो॒त्र॒मि॒त्य॒ग्नि॒ - हो॒त्रम् ।
आ॒सी॒त् । ता॒वान् । अ॒ग्नि॒ष्टो॒म॒ इ॒त्य॒ग्नि॒ - स्तो॒मः॑ । या॒व॒ती॒ ।
पौ॒र्ण॒मा॒सी॒ति॒ पौ॒र्ण॒ - मा॒सी॒ । ता॒वान् । उ॒क्थ्यः॑ । या॒व॒ती॒ ।
अ॒मा॒वा॒स्ये॒त्य॒मा॒ - वा॒स्या॒ । ता॒वान् । अ॒ति॒रा॒त्र॒ इ॒त्य॒ति॒-रा॒त्रः॑ । यः॑ ।

ए॒वम् । वि॒द्वान् । अ॒ग्नि॒हो॒त्रमि॒त्यग्नि॑ – हो॒त्रम् । जु॒होति॑ । याव॑त् ।
अ॒ग्नि॒ष्टोमे॒नेत्य॑ग्नि – स्तो॒मेन॑ । उ॒पा॒प्नोती॑त्युप – आ॒प्नोति॑ । ताव॑त् ।
उ॒पेति॑ । आ॒प्नोति॑ । यः । ए॒वम् । वि॒द्वान् ।
पौ॒र्ण॒मासी॑मिति पौ॒र्ण – मासी॑म् । यज॑ते । याव॑त् । उ॒क्थ्ये॑न ।
उ॒पा॒प्नोती॑त्युप – आ॒प्नोति॑ । 29 (50)

TS 1.6.9.2

ताव॑दु॒पाऽऽप्नो॑ति य ए॒वं वि॒द्वान॑मावा॒स्यां यज॑ते
याव॑दति॒रात्रे॑णो॒पाऽऽप्नो॑ति ताव॑दु॒पाऽऽप्नो॑ति पर॒मे॒ष्ठिनो॑ वा ए॒ष यज्ञो॑ ऽग्र
आसी॑त् तेन॒ स पर॑मां का॒ष्ठाम॑गच्छत् तेन॒ प्रजा॑पतिं नि॒रवा॑साययत्
तेन॒ प्रजा॑पतिः पर॑मां का॒ष्ठाम॑गच्छत् तेने॒न्द्रं नि॒रवा॑साययत् तेने॒न्द्रः
पर॑मां का॒ष्ठाम॑गच्छत् तेना॒ग्नी॒षोमौ॑ नि॒रवा॑साययत् तेना॒ग्नी॒षोमौ॑
पर॑मां का॒ष्ठाम॑गच्छतां य – [] 30

TS 1.6.9.2 (Padam)

ताव॑त् । उ॒पेति॑ । आ॒प्नोति॑ । यः । ए॒वम् । वि॒द्वान् ।
अ॒मावा॒स्यामि॒त्यमा॑ – वा॒स्याम् । यज॑ते । याव॑त् ।
अ॒ति॒रात्रे॑णेत्यति – रा॒त्रेण॑ । उ॒पा॒प्नोती॑त्युप – आ॒प्नोति॑ । ताव॑त् ।

उ॒पेति॑ । आ॒प्नोति॑ । प॒रमे॑ष्ठिनः । वै । ए॒षः । य॒ज्ञः । अ॒ग्रे । आ॒सीत् ।
तेन॑ । सः । प॒रमाम् । का॒ष्ठाम् । अ॒गच्छ॑त् । तेन॑ । प्र॒जाप॑तिमिति
प्र॒जा – प॒तिम् । नि॒रवा॑साययदिति निः – अ॒वासा॑ययत् ।
तेन॑ । प्र॒जाप॑तिरिति प्र॒जा – प॒तिः । प॒रमाम् । का॒ष्ठाम् । अ॒गच्छ॑त् ।
तेन॑ । इ॒न्द्रम् । नि॒रवा॑साययदिति निः – अ॒वासा॑ययत् । तेन॑ । इ॒न्द्रः ।
प॒रमाम् । का॒ष्ठाम् । अ॒गच्छ॑त् । तेन॑ । अ॒ग्नीषो॑मावित्य॒ग्नी – सोमौ॑ ।
नि॒रवा॑साययदिति निः – अ॒वासा॑ययत् । तेन॑ ।
अ॒ग्नीषो॑मावित्य॒ग्नी – सोमौ॑ । प॒रमाम् । का॒ष्ठाम् ।

अ॒गच्छ॑ताम् । यः । 30 (50)

TS 1.6.9.3

ए॒वं वि॒द्वान् द॒र्श॑पूर्णमा॒सौ य॑जते प॒रमा॑मेव का॒ष्ठां ग॑च्छति यो वै
प्र॒जाते॑न य॒ज्ञेन॑ यजते प्र॒प्रज॑या प॒शुभि॑ मि॒थुनै॑ र्जायते द्वा॒दश॑ मा॒साः
सँव॑त्सरो द्वा॒दश॑ द्व॒न्द्वानि॑ द॒र्श॑पूर्णमा॒सयो॑स्तानि संपा॒द्यानी॑त्याहुर्व॒त्सं
चो॑पावसृजत्यु॒खां चा॑धि श्रयत्यव च ह॒न्ति दृ॑षदौ च स॒माह॑न्त्यधि च
व॒पते॑ क॒पाला॑नि चोप दधाति पु॒रोडा॑शं – [] 31

TS 1.6.9.3 (Padam)

ए॒वम् । वि॒द्वान् । द॒र्श॒पूर्ण॒मा॒सा॒वि॒ति॑ द॒र्श॒ – पूर्ण॒मा॒सौ॑ । य॒ज॒ते॑ ।
पर॒माम् । ए॒व । का॒ष्ठाम् । ग॒च्छ॒ति॑ । यः । वै । प्र॒जा॒ते॒ने॒ति॑
प्र – जा॒ते॒न॑ । य॒ज्ञे॒न॑ । य॒ज॒ते॑ । प्रे॒ति॑ । प्र॒ज॒ये॒ति॑ प्र – ज॒या॑ ।
प॒शु॒भि॒रि॒ति॑ प॒शु – भिः॑ । मि॒थु॒नैः॑ । जा॒य॒ते॑ । द्वा॒द॒श॑ । मा॒साः॑ ।
सँ॒व॒त्स॒र॒ इति॑ सं – व॒त्स॒रः॑ । द्वा॒द॒श॑ । द्व॒न्द्वानी॑ति॒ द्वं – द्वा॒नि॑ ।
द॒र्श॒पूर्ण॒मा॒सयो॑रि॒ति॑ द॒र्श॒ – पूर्ण॒मा॒सयोः॑ । ता॒नि॑ ।
सं॒पा॒द्यानी॑ति॒ सं – पा॒द्या॒नि॑ । इति॑ । आ॒हुः॑ । व॒त्स॒म् । च॑ ।
उ॒पा॒व॒सृ॒ज॒ती॒त्यु॒प – अ॒व॒सृ॒ज॒ति॑ । उ॒खाम् । च॑ । अ॒धी॒ति॑ । श्र॒य॒ति॑ ।
अ॒वे॒ति॑ । च॑ । ह॒न्ति॑ । दृ॒ष॒दौ॑ । च॑ । स॒मा॒ह॒न्ती॑ति॒ सं – आ॒ह॒न्ति॑ ।
अ॒धी॒ति॑ । च॑ । व॒प॒ते॑ । क॒पा॒ला॒नि॑ । च॑ । उ॒पे॒ति॑ । द॒धा॒ति॑ ।
पु॒रो॒डा॒शम्॑ । च॑ । 31 (50)

TS 1.6.9.4

चा॒धि॒श्र॒य॒त्या॒ज्यं॑ च स्त॒म्ब॒य॒जुश्च॑ ह॒र॒त्य॒भि॒ च॑ गृ॒ह्णा॒ति॒ वे॒दिं॑ च
प॒रि॒गृ॒ह्णा॒ति॒ प॒त्नीं॑ च॒ सं॒न॒ह॒ति॑ प्रो॒क्ष॒णी॒श्चाऽऽसा॑द॒य॒त्या॒ज्यं॑ चै॒तानि॑ वै

द्वा॒द॒श॒ द्व॒न्द्वा॒नि॒ दर्॒श॒पूर्ण॒मा॒सयो॒स्ता॒नि॒ य॒ ए॒व॒ सं॒पा॒द्य॒ यज॑ते
प्र॒जा॒ते॒नै॒व॒ य॒ज्ञे॒न॒ यज॑ते॒ प्र॒ प्र॒जया॑ प॒शु॒भि॒ मि॒थु॒नै॒र्जा॑यते ॥ 32

TS 1.6.9.4 (Padam)

अ॒धि॒श्रय॑तीत्य॒धि॒ – श्रय॑ति । आ॒ज्य॑म् । च । स्त॒ंब॒य॒जु॒रिति॑
स्त॒ंब॒ – य॒जुः । च । हर॑ति । अ॒भी॒ति॒ । च । गृ॒ह्णा॒ति॒ । वे॒दि॒म् । च ।
परि॒गृ॒ह्णा॒तीति॑ परि – गृ॒ह्णा॒ति॒ । प॒त्नी॑म् । च । स॒मि॒ति॒ । न॒ह्य॒ति॒ ।
प्रो॒क्ष॒णी॒रिति॑ प्र – उ॒क्ष॒णीः । च । आ॒सा॒दय॑तीत्या॒ – सा॒दय॑ति ।
आ॒ज्य॑म् । च । ए॒ता॒नि॒ । वै । द्वा॒द॒श॒ । द्व॒न्द्वा॒नीति॑ द्वं – द्वा॒नि॒ ।
दर्॒श॒पूर्ण॒मा॒सयो॒रिति॑ दर्॒श॒ – पूर्ण॒मा॒सयोः॑ । ता॒नि॒ । यः । ए॒व॒म् ।
सं॒पा॒द्येति॑ सं – पा॒द्य॒ । यज॑ते । प्र॒जा॒ते॒नेति॑ प्र – जा॒ते॒न॒ । ए॒व॒ ।
य॒ज्ञे॒न॒ । यज॑ते । प्रेति॑ । प्र॒जये॑ति प्र – जया॑ ।

प॒शु॒भिरिति॑ प॒शु॒ – भिः । मि॒थु॒नैः । जा॒य॒ते ॥ 32 (40)

(उ॒क्थ्ये॑नोपा॒प्नोत्य॑-गच्छ॒तां॒ यः- पु॒रो॒डा॒शं-च॒त्वारि॑ं॒श्च॒) (A9)

TS 1.6.10.1

ध्रु॒वो ऽसि॑ ध्रु॒वो ऽह॑ सं॒जा॒तेषु॑ भू॒यास॒मित्या॑ह ध्रु॒वा॒ने॒वैनान्॑ कुरु॒त
उ॒ग्रो ऽस्यु॒ग्रो ऽह॑ सं॒जा॒तेषु॑ भू॒यास॒-मि॒त्याहा॑प्रति॒वादि॑न ए॒वैनान्॑

कुरु॑ते ऽभि॒भू-र॑स्यभि॒भू-र॑ह॒ ७ स॒जा॒तेषु॑ भू॒यास॑मि॒त्याह॑ य ए॒वैनं॑
प्र॒त्यु॒त्पि॒पी॒ते त॑मु॒पा॒स्य॒ते यु॒न॒ज्मि॑ त्वा ब्र॒ह्म॒णा दै॒व्ये॒ने॒त्याहै॑ष वा

अ॒ग्ने॒र्यो॒गस्ते॒नै - [] 33

TS 1.6.10.1 (Padam)

ध्रु॒वः । अ॒सि॒ । ध्रु॒वः । अ॒हम् । स॒जा॒तेष्वि॑ति स - जा॒तेषु॑ ।
भू॒यास॑म् । इति॑ । आ॒ह । ध्रु॒वान् । ए॒व । ए॒नान् । कु॒रु॒ते । उ॒ग्रः ।
अ॒सि॒ । उ॒ग्रः । अ॒हम् । स॒जा॒तेष्वि॑ति स-जा॒तेषु॑ । भू॒यास॑म् । इति॑ ।
आ॒ह । अ॒प्र॒ति॒वादि॑न इत्य॒प्रति॑ - वा॒दिनः॑ । ए॒व । ए॒नान् । कु॒रु॒ते ।
अ॒भि॒भू॒रित्य॑भि - भूः । अ॒सि॒ । अ॒भि॒भू॒रित्य॑भि - भूः । अ॒हम् ।
स॒जा॒तेष्वि॑ति स - जा॒तेषु॑ । भू॒यास॑म् । इति॑ । आ॒ह । यः । ए॒व ।
ए॒नम् । प्र॒त्यु॒त्पि॒पी॒त इति॑ प्र॒ति-उ॒त्पि॒पी॒ते । तम् । उ॒पेति॑ । अ॒स्य॒ते ।
यु॒न॒ज्मि॑ । त्वा । ब्र॒ह्म॒णा । दै॒व्ये॒न । इति॑ । आ॒ह । ए॒षः । वै ।
अ॒ग्नेः । यो॒गः । ते॒न । 33 (50)

TS 1.6.10.2

वैनं॑ यु॒नक्ति॑ य॒ज्ञस्य॑ वै स॒मृ॒द्धेन॑ दे॒वाः सु॒वर्गं॑ लो॒कमा॑यन् य॒ज्ञस्य॑
वृ॒द्धेना॑सु॒रान् प॑रा ऽभा॒वय॑न् यन्मे॑ अ॒ग्ने अ॒स्य य॒ज्ञस्य॑ रि॒ष्यादि॑त्याह

य॒ज्ञस्यै॑व तत्समृ॑द्धेन॒ यज॑मानः सु॒वर्गं॑ लो॒कमे॑ति य॒ज्ञस्य॑ व्यृद्धेन॒
भ्रातृ॑व्यान् परा॑ भावयत्यग्नि॒होत्र॑-मे॒ताभि॑ व्या॒हृती॑भिरुप॒ सादये॑द्
य॒ज्ञमु॒खं वा॑ अ॒ग्निहो॑त्रं ब्रह्मै॒ता व्या॑हृतयो य॒ज्ञमु॒ख ए॒व ब्रह्म॑- [] 34

TS 1.6.10.2 (Padam)

ए॒व । ए॒नम् । यु॒नक्ति॑ । य॒ज्ञस्य॑ । वै । स॒मृद्धे॑नेति सं - ऋद्धे॒न ।
दे॒वाः । सु॒वर्गमि॑ति सु॒वः - ग॒म् । लो॒कम् । आ॒यन् । य॒ज्ञस्य॑ ।
व्यृद्धे॑नेति वि - ऋद्धे॒न । अ॒सुरान् । प॒रेति॑ । अ॒भावय॑न् । यत् । मे ।
अ॒ग्ने । अ॒स्य । य॒ज्ञस्य॑ । रि॒ष्यात् । इति॑ । आ॒ह । य॒ज्ञस्य॑ । ए॒व ।
तत् । स॒मृद्धे॑नेति सं - ऋद्धे॒न । यज॑मानः । सु॒वर्गमि॑ति
सु॒वः - ग॒म् । लो॒कम् । ए॒ति । य॒ज्ञस्य॑ । व्यृद्धे॑नेति वि - ऋद्धे॒न ।
भ्रातृ॑व्यान् । प॒रेति॑ । भा॒वय॑ति । अ॒ग्निहो॑त्रमित्यग्नि - हो॒त्रम् ।
ए॒ताभिः॑ । व्या॒हृती॑भिरिति व्या॒हृति॑ - भिः । उ॒पेति॑ । सा॒दये॑त् ।
य॒ज्ञमु॒खमि॑ति य॒ज्ञ - मु॒खम् । वै । अ॒ग्निहो॑त्रमित्यग्नि - हो॒त्रम् ।
ब्रह्म॑ । ए॒ताः । व्या॑हृतय इति वि - आ॒हृतयः॑ ।
य॒ज्ञमु॒ख इति॑ य॒ज्ञ - मु॒खे । ए॒व । ब्रह्म॑ । 34 (50)

TS 1.6.10.3

कुरु॑ते सँ॒व॒थ्स॒रे पर्या॑गत ए॒ताभि॑रे॒वोप॑ सादयेद्-ब्र॒ह्म॒णैवो॒भय॑तः
सँ॒व॒थ्स॒रं परि॑ गृ॒ह्णाति॑ दर्॒श॒पूर्ण॑मा॒सौ चा॑तुर्मा॒स्यान्या॒लभ॑मान
ए॒ताभिर्व्या॑ह॒तीभिर्ह॒वीऽष्याऽऽ सा॑दयेद्-य॒ज्ञमु॒खं वै दर्॒श॒पूर्ण॑मा॒सौ
चा॑तुर्मा॒स्यानि॒ ब्रह्मै॒ता व्या॑हतयो य॒ज्ञमु॒ख ए॒व ब्र॒ह्म कुरु॑ते सँ॒व॒थ्स॒रे
पर्या॑गत ए॒ताभिरे॒वाऽऽ सा॑दयेद् ब्र॒ह्म॒णैवो॒भय॑तः सँ॒व॒थ्स॒रं परि॑गृ॒ह्णाति॑
यद्-वै य॒ज्ञस्य॒ साम्ना॑ क्रि॒यते॑ रा॒ष्ट्रं - [] 35

TS 1.6.10.3 (Padam)

कुरु॑ते । सँ॒व॒थ्स॒र इति॑ सं - व॒थ्स॒रे । पर्या॑गत इति॑ परि - आ॒गते॑ ।
ए॒ताभिः॑ । ए॒व । उपे॑ति । सा॒दये॑त् । ब्र॒ह्म॒णा । ए॒व । उ॒भय॑तः ।
सँ॒व॒थ्स॒रमि॑ति सं - व॒थ्स॒रम् । परी॑ति । गृ॒ह्णाति॑ ।
दर्॒श॒पूर्ण॑मा॒सावि॑ति दर्॒श - पूर्ण॑मा॒सौ । चा॑तुर्मा॒स्यानी॑ति
चा॑तुः - मा॒स्यानि॑ । आ॒लभ॑मान इत्या॑ - लभ॑मानः । ए॒ताभिः॑ ।
व्या॑ह॒तीभि॒रिति॑ व्या॑हति - भिः । ह॒वीऽषि॑ । ए॒ति । सा॒दये॑त् ।
य॒ज्ञमु॒खमि॑ति य॒ज्ञ - मु॒खम् । वै । दर्॒श॒पूर्ण॑मा॒सावि॑ति
दर्॒श - पूर्ण॑मा॒सौ । चा॑तुर्मा॒स्यानी॑ति चा॑तुः - मा॒स्यानि॑ । ब्र॒ह्म ।

ए॒ताः । व्या॒ह॒त॒य॒ इति॑ वि – आ॒ह॒त॒यः॑ । य॒ज्ञ॒मु॒ख॒ इति॑ य॒ज्ञ – मु॒खे ।
ए॒व । ब्र॒ह्म॑ । कु॒रु॒ते । सँ॒व॒थ्स॒र॒ इति॑ सं – व॒थ्स॒रे । प॒र्या॒ग॒त॒ इति॑
प॒रि – आ॒ग॒ते । ए॒ताभिः॑ । ए॒व । ए॒ति । सा॒द॒ये॒त् । ब्र॒ह्म॒णा । ए॒व ।
उ॒भ॒य॒तः॑ । सँ॒व॒थ्स॒र॒मि॒ति॑ सं – व॒थ्स॒र॒म् । प॒री॒ति॑ । गृ॒ह्णा॒ति॑ । य॒त् ।
वै । य॒ज्ञ॒स्य॑ । सा॒म्ना॑ । क्रि॒य॒ते॑ । रा॒ष्ट्र॒म् । 35 (50)

TS 1.6.10.4

य॒ज्ञ॒स्याऽऽशी॑र्गच्छति॒ यद्वा॑ वि॒शं॑ य॒ज्ञ॒स्याऽऽशी॑र्गच्छत्यथ
ब्रा॒ह्म॒णो ऽना॑शीर्के॒ण य॒ज्ञेन॑ यज॒ते सा॒मि॒धेनी॑-र॒नु॒व॒क्ष्य॒न्ने॒ता व्या॑ह॒तीः
पु॒र॒स्ताद्-द॒ध्याद् ब्र॒ह्मै॒व प्र॑ति॒प॒दं कु॒रु॒ते त॒था ब्रा॒ह्म॒णः सा॑शीर्के॒ण
य॒ज्ञेन॑ यज॒ते यं का॒म॒ये॒त य॒ज॒मा॒नं भ्रा॑तृ॒व्य॒म॒स्य
य॒ज्ञ॒स्याऽऽशी॑र्गच्छे॒दिति॑ तस्यै॒ ता व्या॑ह॒तीः पु॒रो॒नु॒वा॒क्या॒यां द॒ध्याद्
भ्रा॑तृ॒व्य॒दे॒व॒त्या वै पु॒रो॒नु॒वा॒क्या भ्रा॑तृ॒व्य॒मे॒वा॒स्य य॒ज्ञ॒स्या – [] 36

TS 1.6.10.4 (Padam)

य॒ज्ञ॒स्य॑ । आ॒शी॒रि॒त्या – शीः॑ । ग॒च्छ॒ति॑ । य॒त् । ऋ॒चा । वि॒श॒म् ।
य॒ज्ञ॒स्य॑ । आ॒शी॒रि॒त्या – शीः॑ । ग॒च्छ॒ति॑ । अ॒थ । ब्रा॒ह्म॒णः ।
अ॒ना॒शी॒र्के॒ण । य॒ज्ञेन॑ । यज॒ते । सा॒मि॒धेनी॑रि॒ति॑ सा॒म् – इ॒धे॒नीः॑ ।

अ॒नु॒व॒क्ष्यन्ति॑त्यनु॒ – व॒क्ष्यन् । ए॒ताः । व्या॒हृती॑रिति॒ वि – आ॒हृतीः॑ ।
पु॒रस्ता॑त् । द॒द्ध्यात् । ब्र॒ह्म । ए॒व । प्र॒ति॒प॒दमि॑ति॒ प्रति॑-प॒दम् ।
कु॒रुते॑ । त॒था । ब्रा॒ह्मणः॑ । सा॒शीर्के॑णेति॒ स – आ॒शीर्के॑ण । य॒ज्ञेन॑ ।
य॒जते॑ । यम् । का॒मये॑त । य॒ज॒मा॒नम् । भ्रा॒तृ॒व्यम् । अ॒स्य । य॒ज्ञस्य॑ ।
आ॒शीरि॑त्या – शीः । ग॒च्छेत् । इति॑ । त॒स्य । ए॒ताः ।
व्या॒हृती॑रिति॒ वि – आ॒हृतीः॑ ।

पु॒रो॒नु॒वा॒क्या॒यामि॑ति॒ पुरः॑ – अ॒नु॒वा॒क्या॒याम् । द॒द्ध्यात् ।
भ्रा॒तृ॒व्यदे॒वत्ये॑ति॒ भ्रा॒तृ॒व्य – दे॒वत्या॑ । वै । पु॒रो॒नु॒वा॒क्येति॑
पुरः॑ – अ॒नु॒वा॒क्या । भ्रा॒तृ॒व्यम् । ए॒व । अ॒स्य । य॒ज्ञस्य॑ । 36 (50)

TS 1.6.10.5

ऽऽशी॑र्गच्छति॒ यान् का॒मये॑त॒ यज॑मानान्त् स॒माव॑त्येनान्. य॒ज्ञस्या
ऽऽशी॑र्गच्छे॒दिति॑ ते॒षामे॒ता व्या॑हृतीः॒ पु॒रो॒नु॒वा॒क्या॒या अ॒र्धर्च॑ ए॒कां
द॒द्ध्याद्या॒ज्यायै॑ पु॒रस्ता॑दे॒कां या॒ज्या॒या अ॒र्धर्च॑ ए॒कां तथै॑नान्त्
स॒माव॑ती॒ य॒ज्ञस्याऽऽशी॑र्गच्छति॒ यथा॑ वै प॒र्जन्यः॑ सु॒वृष्टं॑ व॒र्षत्ये॑वं

य॒ज्ञो य॒ज॒मा॒नाय॑ व॒र्ष॒ति॒ स्थ॒ल॒यो॒द॒कं॑ प॒रि॒गृ॒ह्ण॒न्त्या॒शि॒षा॑ य॒ज्ञं
य॒ज॒मा॒नः॑ प॒रि॒ गृ॒ह्णा॒ति॒म॒नो॑ ऽसि॒ प्रा॒जा॒प॒त्यं॑ – [] 37

TS 1.6.10.5 (Padam)

आ॒शी॒रि॒त्या॑ – शीः॑ । ग॒च्छ॒ति॒ । या॒न् । का॒म॒ये॒त॑ । य॒ज॒मा॒ना॒न् ।
स॒मा॒व॒ती॑ । ए॒ना॒न् । य॒ज्ञ॒स्य॑ । आ॒शी॒रि॒त्या॑ – शीः॑ । ग॒च्छे॒त् । इति॑ ।
तेषा॑म् । ए॒ताः॑ । व्या॒ह॒ती॒रि॒ति॑ वि – आ॒ह॒तीः॑ ।
पु॒रो॒नु॒वा॒क्या॒या॑ इति॑ पु॒रः–अ॒नु॒वा॒क्या॒याः॑ । अ॒र्ध॒र्च॑ इत्य॒र्ध॒–ऋ॒चे॑ ।
ए॒का॒म् । द॒द्ध्य॒ात् । या॒ज्या॒यै॑ । पु॒र॒स्ता॒त् । ए॒का॒म् । या॒ज्या॒याः॑ ।
अ॒र्ध॒र्च॑ इत्य॒र्ध॒ – ऋ॒चे॑ । ए॒का॒म् । त॒था॑ । ए॒ना॒न् । स॒मा॒व॒ती॑ ।
य॒ज्ञ॒स्य॑ । आ॒शी॒रि॒त्या॑ – शीः॑ । ग॒च्छ॒ति॒ । य॒था॑ । वै । प॒र्ज॒न्यः॑ ।
सु॒वृ॒ष्ट॒मि॒ति॒ सु॑ – वृ॒ष्ट॒म् । व॒र्ष॒ति॒ । ए॒व॒म् । य॒ज्ञः॑ । य॒ज॒मा॒नाय॑ ।
व॒र्ष॒ति॒ । स्थ॒ल॒या॑ । उ॒द॒क॒म् । प॒रि॒गृ॒ह्ण॒न्तीति॑ प॒रि॒ – गृ॒ह्ण॒न्ति॑ ।
आ॒शि॒षे॒त्या॑ – शि॒षा॑ । य॒ज्ञ॒म् । य॒ज॒मा॒नः॑ । प॒री॒ति॑ । गृ॒ह्णा॒ति॒ । म॒नः॑ ।
अ॒सि॒ । प्रा॒जा॒प॒त्यमि॒ति॑ प्रा॒जा – प॒त्य॒म् । 37 (50)

TS 1.6.10.6

मन॑सा मा भू॒तेनाऽऽ वि॒शेत्या॑ह मनो॒ वै प्रा॑जापत्यं प्रा॑जापत्यो य॒ज्ञो
मन॑ ए॒व य॒ज्ञमा॒त्मन् ध॑त्ते वा॒गस्यै॒न्द्री स॑प॒न्नक्ष॑यणी वा॒चा
॥ मे॒न्द्रिये॑णाऽऽ वि॒शेत्या॑है॒न्द्री वै वा॒ग्वाच॑-मे॒वैन्द्री॑-मा॒त्मन् ध॑त्ते ॥ 38

TS 1.6.10.6 (Padam)

मन॑सा । मा । भू॒तेन॑ । ए॒ति । वि॒श । इ॒ति । आ॒ह । मनः॑ । वै ।
प्रा॒जाप॒त्यमि॑ति प्रा॒जा – प॒त्यम् । प्रा॒जाप॒त्य इ॒ति प्रा॒जा – प॒त्यः ।
य॒ज्ञः । मनः॑ । ए॒व । य॒ज्ञम् । आ॒त्मन् । ध॑त्ते । वाक् । अ॒सि ।
ऐ॒न्द्री । स॑प॒न्नक्ष॑यणीति स॑प॒न्न – क्ष॑यणी । वा॒चा । मा । इ॒न्द्रिये॑ण ।
ए॒ति । वि॒श । इ॒ति । आ॒ह । ऐ॒न्द्री । वै । वाक् । वा॒चम् । ए॒व ।
ऐ॒न्द्रीम् । आ॒त्मन् । ध॑त्ते ॥ 38 (36) (तेनै॒-व ब्र॑ह्म- रा॒ष्ट्र-
मे॒वास्य॑ य॒ज्ञस्य॑-प्रा॒जाप॒त्यञ्-षट्त्रि॑ञ्शच्च) (A10)

TS 1.6.11.1

यो वै स॑प्तद॒शं प्र॒जाप॑तिं य॒ज्ञम॒न्वाय॑त्तं वे॒द प्र॑ति य॒ज्ञेन॑ तिष्ठति
न य॒ज्ञाद् भ्र॑ञ्शत॒ आ श्रा॑वयेति चतु॒रक्ष॑रमस्तु श्रौष॑डिति चतु॒रक्ष॑रं
य॒जेति॑ द॒व्यक्ष॑रं ये य॒जाम॑ह इति पञ्चा॒क्षरं॑ द॒व्यक्ष॑रो वषट्का॒र

ए॒ष वै स॒प्त॒द॒शः॑ प्र॒जा॒प॒ति॑ र्य॒ज्ञ॒म॒न्वा॒य॒त्तो॒ य ए॒वं वे॒द॒ प्रति॑ य॒ज्ञेन॑
ति॒ष्ठ॒ति॒ न य॒ज्ञाद्-भ्र॑ञ्शते॒ यो वै य॒ज्ञस्य॑ प्रा॒यणं॑ प्र॒तिष्ठा- [] 39

TS 1.6.11.1 (Padam)

यः । वै । स॒प्त॒द॒शमि॑ति स॒प्त - द॒शम् । प्र॒जा॒प॒तिमि॑ति
प्र॒जा - प॒तिम् । य॒ज्ञम् । अ॒न्वा॒य॒त्तमि॑त्यनु - आ॒य॒त्तम् । वे॒द ।
प्र॒ती॒ति॒ । य॒ज्ञेन॑ । ति॒ष्ठ॒ति॒ । न । य॒ज्ञात् । भ्र॑ञ्शते॒ । ए॒ति॒ । श्रा॒व॒य॒ ।
इ॒ति॒ । च॒तु॒रक्ष॑रमि॒ति॒ च॒तुः - अ॒क्ष॒रम् । अ॒स्तु॒ । श्रौ॒ष॒ट् । इ॒ति॒ ।
च॒तु॒रक्ष॑रमि॒ति॒ च॒तुः - अ॒क्ष॒रम् । य॒ज॒ । इ॒ति॒ ।
द्व्य॑क्ष॒रमि॑ति॒ द्वि - अ॒क्ष॒रम् । ये॒ । य॒जाम॑हे । इ॒ति॒ ।
पञ्चा॑क्ष॒रमि॑ति॒ पञ्च - अ॒क्ष॒रम् । द्व्य॑क्ष॒र इ॒ति॒ द्वि - अ॒क्ष॒रः ।
व॒ष॒ट्का॒र इ॒ति॒ व॒ष॒ट् - का॒रः । ए॒षः । वै । स॒प्त॒द॒श इ॒ति॒
स॒प्त - द॒शः । प्र॒जा॒प॒तिरि॑ति॒ प्र॒जा - प॒तिः । य॒ज्ञम् । अ॒न्वा॒य॒त्त
इ॒त्यनु॑-आ॒य॒त्तः । यः । ए॒वम् । वे॒द । प्र॒ती॒ति॒ । य॒ज्ञेन॑ । ति॒ष्ठ॒ति॒ । न ।
य॒ज्ञात् । भ्र॑ञ्शते॒ । यः । वै । य॒ज्ञस्य॑ ।
प्रा॒य॒णमि॑ति॒ प्र - अ॒य॒नम् । प्र॒तिष्ठा॑मि॒ति॒ प्रति॑ - स्था॒म् । 39 (50)

TS 1.6.11.2

–मु॒दय॑नं॒ वे॒द॒ प्र॒ति॒ष्ठि॒ते॒ना॒रि॒ष्टे॒न॒ य॒ज्ञे॒न॒ स॒॒॒स्थां॒ ग॒च्छ॒त्या॒श्रा॒व॒या॒स्तु॒
श्रौ॒ष॒ड् य॒ज॒ ये॒ य॒जाम॑हे॒ व॒षट्कार॑ ए॒तद्–वै॒ य॒ज्ञस्य॑ प्रा॒य॒ण॒मेषा॑
प्र॒ति॒ष्ठै॒तदु॒दय॑नं॒ य॒ ए॒वं वे॒द॒ प्र॒ति॒ष्ठि॒ते॒ना॒रि॒ष्टे॒न॒ य॒ज्ञे॒न॒
स॒॒॒स्थां॒ ग॒च्छ॒ति॒ यो॒ वै सू॒नृ॒तायै॑ दो॒हं वे॒द॒ दु॒ह ए॒वैनां॑ य॒ज्ञो
वै सू॒नृ॒ताऽऽ श्रा॒व॒ये॒त्यै॒वैना॑–म॒ह॒द॒स्तु॒ – [] 40

TS 1.6.11.2 (Padam)

उ॒दय॑न॒मि॒त्युत् – अ॒य॒नम् । वे॒द । प्र॒ति॒ष्ठि॒ते॒ने॒ति॒ प्र॒ति – स्ति॒थि॒ते॒न॒ ।
अ॒रि॒ष्टे॒न॒ । य॒ज्ञे॒न॒ । स॒॒॒स्था॒मि॒ति॒ सं – स्था॒म् । ग॒च्छ॒ति॒ । ए॒ति॒ ।
श्रा॒व॒य॒ । अ॒स्तु॒ । श्रौ॒ष॒ट् । य॒ज॒ । ये॒ । य॒जाम॑हे॒ । व॒षट्कार॑ इति॒
व॒षट् – का॒रः॒ । ए॒तत् । वै॒ । य॒ज्ञस्य॑ । प्रा॒य॒ण॒मि॒ति॒ प्र – अ॒य॒नम् ।
ए॒षा । प्र॒ति॒ष्ठे॒ति॒ प्र॒ति – स्था॒ । ए॒तत् । उ॒दय॑न॒मि॒त्युत् – अ॒य॒नम् ।
यः॒ । ए॒वम् । वे॒द॒ । प्र॒ति॒ष्ठि॒ते॒ने॒ति॒ प्र॒ति–स्ति॒थि॒ते॒न॒ । अ॒रि॒ष्टे॒न॒ । य॒ज्ञे॒न॒ ।
स॒॒॒स्था॒मि॒ति॒ सं – स्था॒म् । ग॒च्छ॒ति॒ । यः॒ । वै॒ । सू॒नृ॒तायै॑ । दो॒हम्॑ ।
वे॒द॒ । दु॒हे॒ । ए॒व॒ । ए॒नाम्॑ । य॒ज्ञः॒ । वै॒ । सू॒नृ॒ता॒ । ए॒ति॒ । श्रा॒व॒य॒ ।
इति॑ । ए॒ति॑ । ए॒व॒ । ए॒नाम्॑ । अ॒ह॒त् । अ॒स्तु॒ । 40 (50)

TS 1.6.11.3

श्रौ॒षडि॒त्युपा॒वा॒स्राग्-य॒जेत्यु॑दनै॒षीद्-ये य॒जाम॑ह इत्युपा॒ ऽस॒दद्-
व॒षट्कारे॑ण॒ दो॒ग्ध्येष॑ वै सू॒नृता॑यै॒ दोहो॑ य ए॒वं वे॑द दु॒ह ए॒वैनां॑ दे॒वा
वै स॒त्रमा॑स॒त तेषां॑ दि॒शो ऽद॒स्यन् त ए॒तामा॒र्द्रां प॒ङ्क्ति॑मप॒श्यन्
नाऽऽ श्रा॒वये॑ति पु॒रोवा॒त-म॒जन॑यन्नस्तु श्रौ॒षडि॒त्यभ्र॑ सम॒प्लाव॑यन्.
य॒जेति॑ वि॒द्युत॑ - [] 41

TS 1.6.11.3 (Padam)

श्रौ॒षट् । इति॑ । उ॒पा॒वा॒स्रागि॒त्युप॑-अ॒वा॒स्राक् । य॒ज । इति॑ ।
उ॒दि॒ति । अ॒नै॒षीत् । ये । य॒जाम॑हे । इति॑ । उ॒पेति॑ । अ॒स॒दत् ।
व॒षट्कारे॑णेति॒ व॒षट्-का॒रेण॑ । दो॒ग्धि । ए॒षः । वै । सू॒नृता॑यै । दो॒हः ।
यः । ए॒वम् । वे॑द । दु॒हे । ए॒व । ए॒नाम् । दे॒वाः । वै । स॒त्रम् ।
आ॒स॒त । तेषा॑म् । दि॒शः । अ॒द॒स्यन् । ते । ए॒ताम् । आ॒र्द्राम् ।
प॒ङ्क्ति॑म् । अ॒प॒श्यन् । एति॑ । श्रा॒वय॑ । इति॑ । पु॒रोवा॒तमि॑ति
पु॒रः - वा॒तम् । अ॒ज॒न॒यन् । अस्तु॑ । श्रौ॒षट् । इति॑ । अ॒भ्रम् ।
समि॑ति । अ॒प्ला॒व॒यन् । य॒ज । इति॑ ।
वि॒द्युत॑मि॒ति वि॑ - द्यु॒तम् । 41 (50)

TS 1.6.11.4

–म॒जन॒यन्॒ ये॒ य॒जाम॒हे॒ इति॑ प्रा॒वर्ष॒यन्–न्न॒भ्यस्त॒नयन्॑ व॒षट्कारे॑ण
ततो॑ वै ते॒भ्यो दि॒शः प्रा॒प्याय॑न्त॒ य ए॒वं वे॒द प्रा॒स्मै दि॒शः प्या॑यन्ते
प्र॒जाप॑तिं त्वो॒वेद॑ प्र॒जाप॑ति–स्त्वँ॒वेद॑ यं प्र॒जाप॑तिर्वे॒द स पु॒ण्यो
भव॑त्येष॒ वै छ॒न्दस्यः॑ प्र॒जाप॑तिरा॒ श्राव॑यास्तु॒ श्रौष॑ड् यज॒ ये य॒जाम॒हे
व॒षट्कारो॑ य ए॒वं वे॒द पु॒ण्यो भ॑वति वस॒न्त – [] 42

TS 1.6.11.4 (Padam)

अ॒ज॒न॒यन् । ये । य॒जाम॒हे । इति॑ । प्रेति॑ । अ॒वर्ष॒यन् । अ॒भीति॑ ।
अ॒स्त॒न॒यन् । व॒षट्कारे॑णेति॑ व॒षट् – का॒रेण॑ । ततः॑ । वै । ते॒भ्यः ।
दि॒शः । प्रेति॑ । अ॒प्या॒य॒न्त॒ । यः । ए॒वम् । वे॒द । प्रेति॑ । अ॒स्मै ।
दि॒शः । प्या॑यन्ते । प्र॒जाप॑तिमिति॑ प्र॒जा – प॒तिम् ।
त्वो॒वेदे॑ति॑ त्वः – वे॒द । प्र॒जाप॑तिरिति॑ प्र॒जा – प॒तिः । त्वँ॒वेदे॑ति॑
त्वं – वे॒द । यम् । प्र॒जाप॑तिरिति॑ प्र॒जा–प॒तिः । वे॒द । सः । पु॒ण्यः ।
भ॒वति॑ । ए॒षः । वै । छ॒न्दस्यः॑ । प्र॒जाप॑तिरिति॑ प्र॒जा – प॒तिः । एति॑ ।
श्रा॒व॒य । अस्तु॑ । श्रौष॑ट् । यज॑ । ये । य॒जाम॒हे ।

व॒षट्कार॑ इति॑ व॒षट् – का॒रः । यः । ए॒वम् । वे॒द । पु॒ण्यः । भ॒वति॑ ।

व॒स॒न्तम् । 42 (50)

TS 1.6.11.5

–मृ॒तूनां॑ प्री॒णामी॒त्याह॑र्त॒वो वै प्र॑या॒जा ऋ॒तूने॒व प्री॑णाति॒ ते ऽस्मै॑ प्री॒ता
यथा॑पूर्व॑ कल्प॒न्ते कल्प॑न्ते ऽस्मा ऋ॒तवो॑ य ए॒वं वे॒दाग्नी॑षोमयो॒रहं॑
दे॒वय॑ज्यया चक्षु॒ष्मान् भू॒यास॑–मि॒त्याहा॒ग्नीषो॑मा॒भ्यां वै य॒ज्ञश्चक्षु॑ष्मान्
ताभ्या॑मे॒व चक्षु॑रा॒त्मन् ध॑त्ते ऽग्ने॒रहं॑ दे॒वय॑ज्यया ऽन्ना॒दो
भू॒यास॑मि॒त्याहा॒ग्निर्वै दे॒वाना॑मन्ना॒दस्ते॑ नै॒ वा – [] 43

TS 1.6.11.5 (Padam)

ऋ॒तूनाम् । प्री॒णामि॑ । इति॑ । आ॒ह । ऋ॒तवः॑ । वै । प्र॑या॒जा इति॑
प्र – या॒जाः । ऋ॒तून् । ए॒व । प्री॒णाति॑ । ते । अ॒स्मै । प्री॒ताः ।
यथा॑पूर्व॑मि॒ति यथा॑ – पूर्॒वम् । कल्प॑न्ते । कल्प॑न्ते । अ॒स्मै ।
ऋ॒तवः॑ । यः । ए॒वम् । वे॒द । अ॒ग्नीषो॑मयो॒रित्य॑ग्नी – सोम॑योः ।
अ॒हम् । दे॒वय॑ज्ययेति॑ दे॒व–य॑ज्यया । चक्षु॒ष्मान् । भू॒यास॑म् । इति॑ ।
आ॒ह । अ॒ग्नीषो॑मा॒भ्यामि॒त्यग्नी॑ – सोमा॑भ्याम् । वै । य॒ज्ञः ।
चक्षु॒ष्मान् । ताभ्या॑म् । ए॒व । चक्षुः॑ । आ॒त्मन् । ध॑त्ते । अ॒ग्नेः ।

अ॒हम् । दे॒वय॒ज्यये॑ति दे॒व – य॒ज्यया॑ । अ॒न्नाद॑ इत्य॒न्न – अ॒दः ।

भू॒या॒सम् । इति॑ । आ॒ह । अ॒ग्निः । वै । दे॒वाना॑म् ।

अ॒न्नाद॑ इत्य॒न्न – अ॒दः । तेन॑ । ए॒व । 43 (50)

TS 1.6.11.6

ऽन्नाद्य॑-मा॒त्मन् ध॑त्ते द॒ब्धि॒रस्य॑द॒ब्धो भू॒या॒सम॑मुं द॒भेय॑-मि॒त्याहै॑तया
वै द॒ब्ध्या दे॒वा अ॒सुरा॑नद॒भ्नुव॑न् तयै॒व भ्रा॑तृ॒व्यं द॒भ्नो॑त्य॒ग्नीषो॑मयो॒रहं
दे॒वय॒ज्यया॑ वृ॒त्रहा॑ भू॒या॒समि॒त्याहा॑ ऽग्नी॒षोमा॑भ्यांँ वा इन्द्रो॑

वृ॒त्रम॑हन् ता॒भ्यामे॒व भ्रा॑तृ॒व्यं स्तृ॑णुत इन्द्रा॒ग्नियो॒रहं
दे॒वय॒ज्यये॑न्द्रि॒याव्य॑न्नादो भू॒या॒समि॒त्याहे॑न्द्रि॒याव्ये॑वान्नादो
भ॒वती॑न्द्र॒स्या – [] 44

TS 1.6.11.6 (Padam)

अ॒न्नाद्य॑मि॒त्यन्न॑ – अ॒द्यम् । आ॒त्मन् । ध॑त्ते । द॒ब्धिः । अ॒सि ।
अ॒द॒ब्धः । भू॒या॒सम् । अ॒मुम् । द॒भेय॑म् । इति॑ । आ॒ह । ए॒तया॑ । वै ।
द॒ब्ध्या॑ । दे॒वाः । अ॒सुरा॑न् । अ॒द॒भ्नुव॑न् । तया॑ । ए॒व । भ्रा॑तृ॒व्यम् ।
द॒भ्नो॑ति । अ॒ग्नीषो॑मयो॒रित्य॑ग्नी – सोम॑योः । अ॒हम् ।
दे॒वय॒ज्यये॑ति दे॒व – य॒ज्यया॑ । वृ॒त्रहे॑ति वृ॒त्र – हा । भू॒या॒सम् ।

इति॑ । आ॒ह । अ॒ग्नी॒षो॒मा॒भ्या॒मित्य॒ग्नी॑ – सो॒मा॒भ्याम् । वै । इन्द्रः॑ ।
वृ॒त्रम् । अ॒हन् । ता॒भ्याम् । ए॒व । भ्रा॒तृ॒व्यम् । स्तृ॒णु॒ते ।
इन्द्रा॒ग्नियो॒रितीन्द्र॑ – अ॒ग्नियोः॑ । अ॒हम् । दे॒वय॒ज्यये॑ति
दे॒व – य॒ज्यया॑ । इन्द्रि॒यावी॑ । अ॒न्नाद॑ इत्य॒न्न – अ॒दः । भू॒या॒सम् ।
इति॑ । आ॒ह । इन्द्रि॒यावी॑ । ए॒व । अ॒न्नाद॑ इत्य॒न्न – अ॒दः । भ॒वति॑ ।
इन्द्र॑स्य । 44 (50)

TS 1.6.11.7

ऽहं॑ दे॒वय॒ज्यये॑न्द्रि॒यावी॑ भू॒या॒समि॒त्याहेन्द्रि॒याव्ये॑व भ॒वति॑
महेन्द्र॑स्याहं॑ दे॒वय॒ज्यया॑ जे॒मानं॑ म॒हि॒मानं॑ गमे॒यमि॒त्याह॑
जे॒मान॑मे॒व म॒हि॒मानं॑ गच्छत्य॒ग्नेः स्वि॒ष्टकृ॑तो ऽहं॑ दे॒वय॒ज्यया॑
ऽऽयु॑ष्मान्. य॒ज्ञेन॑ प्र॒तिष्ठां॑ गमे॒यमि॒त्याहा॒युरे॒वात्म॑न् ध॒त्ते प्र॒ति
य॒ज्ञेन॑-तिष्ठति ॥ 45

TS 1.6.11.7 (Padam)

अ॒हम् । दे॒वय॒ज्यये॑ति दे॒व-य॒ज्यया॑ । इन्द्रि॒यावी॑ । भू॒या॒सम् । इति॑ ।
आ॒ह । इन्द्रि॒यावी॑ । ए॒व । भ॒वति॑ । महेन्द्र॑स्येति॑ म॒हा – इन्द्र॑स्य ।
अ॒हम् । दे॒वय॒ज्यये॑ति दे॒व – य॒ज्यया॑ । जे॒मानम् । म॒हि॒मानम् ।

ग॒मे॒य॒म् । इति॑ । आ॒ह॒ । जे॒मा॒न॒म् । ए॒व । म॒हि॒मा॒न॒म् । ग॒च्छ॒ति॑ ।
अ॒ग्नेः॑ । स्वि॒ष्ट॒कृ॒त॒ इति॑ स्वि॒ष्ट – कृ॒तः॑ । अ॒ह॒म् । दे॒व॒य॒ज्य॒येति॑
दे॒व – य॒ज्य॒या॑ । आ॒यु॒ष्मा॒न् । य॒ज्ञे॒न॑ । प्र॒ति॒ष्ठा॒मि॒ति॑ प्र॒ति– स्था॒म् ।
ग॒मे॒य॒म् । इति॑ । आ॒ह॒ । आ॒युः॑ । ए॒व । आ॒त्म॒न् । ध॒त्ते॑ । प्र॒ती॒ति॑ ।
य॒ज्ञे॒न॑ । ति॒ष्ठ॒ति॑ ॥ 45 (38)

(प्र॒ति॒ष्ठा–म॒ह॒द॒स्तु–वि॒द्यु॒तं–ँव॒स॒न्तं–ते॒नै॒वे–न्द्र॒स्या–ष्टा॒त्रिं॒श॒च्च॑)
(A11)

TS 1.6.12.1

इ॒न्द्रं॑ँ॒ वो॒ वि॒श्व॒त॒स्प॒रि॒ ह॒वा॒म॒हे॒ ज॒ने॒भ्यः॑ । अ॒स्मा॒क॒म॒स्तु॒ के॒वलः॑ ॥
इ॒न्द्रं॑ न॒रो॒ ने॒म॒धि॒ता॒ ह॒व॒न्ते॒ य॒त्पा॒र्या॑ यु॒न॒ज॒ते॒ धि॒य॒स्ताः॑ ।
शू॒रो॒ नृ॒षा॒ता॒ श॒व॒स॒श्च॒का॒न॒ आ॒ गो॒म॒ति॒ ब्र॒जे॒ भ॒जा॒ त्वं॑ नः॑ ॥
इ॒न्द्रि॒या॒णि॒ श॒त॒क्र॒तो॒ या॒ ते॒ ज॒ने॒षु॑ प॒ञ्च॒सु॑ । इ॒न्द्र॒ ता॒नि॒ त॒ आ॒ वृ॒णे॑ ॥
अ॒नु॒ ते॒ दा॒यि॒ म॒ह॒ इ॒न्द्रि॒या॒य॒ स॒त्रा॒ ते॒ वि॒श्व॒म॒नु॑ वृ॒त्र॒ह॒त्यै॑ ।
अ॒नु–[] 46

TS 1.6.12.1 (Padam)

इन्द्रम् । वः । विश्वतः । परीति । हवामहे । जनैभ्यः ॥ अस्माकम् ।
अस्तु । केवलः ॥ इन्द्रम् । नरः । नेमधितेति नेम – धिता ।
हवन्ते । यत् । पार्याः । युनजते । धियः । ताः ॥ शूरः । नृषातेति
नृ – साता । शवसः । चकानः । एति । गोमतीति गो – मति ।
व्रजे । भज । त्वम् । नः ॥ इन्द्रियाणि । शतक्रतो इति
शत – क्रतो । या । ते । जनेषु । पञ्चस्विति पञ्च – सु ॥
इन्द्र । तानि । ते । एति । वृणे ॥ अन्विति । ते । दायि । महे ।
इन्द्रियाय । सत्रा । ते । विश्वम् । अन्विति ।
वृत्रहत्य इति वृत्र – हत्यै ॥ अन्विति । 46 (50)

TS 1.6.12.2

क्षत्रमनु सहो यजत्रेन्द्र देवेभिरनु ते नृषह्यै ॥
आयस्मिन् थ्सप्त वासवा स्तिष्ठन्ति स्वारुहो यथा ।
ऋषिर्. ह दीर्घश्रुत्तम इन्द्रस्य घर्मो अतिथिः ॥
आमासु पक्वमैरय आ सूर्यं रोहयो दिवि ।
घर्मं न सामन् तपता सुवृक्तिभिर्जुष्टं गिर्वणसे गिरः ॥

इन्द्र॑मिद् गा॒थिनो॑ बृ॒हदिन्द्र॑-म॒र्केभि॑-र॒र्किणः॑ । इन्द्रं॑ वा॒णीरनू॑षत ॥
गाय॑न्ति त्वा गा॒यत्रि॑णो – [] 47

TS 1.6.12.2 (Padam)

क्ष॒त्रम् । अ॒न्विति॑ । स॒हः । य॒जत्र॑ । इन्द्र॑ । दे॒वेभिः॑ । अ॒न्विति॑ । ते ।
नृ॒षह्य॑ इति॑ नृ-स॒ह्ये ॥ एति॑ । यस्मिन् । स॒प्त । वा॒सवाः ।
तिष्ठ॑न्ति । स्वा॒रुह॑ इति॑ स्व – रु॒हः । य॒था ॥ ऋ॒षिः । ह ।
दी॒र्घश्रु॑त्तम॒ इति॑ दी॒र्घश्रु॑त् – त॒मः । इन्द्र॑स्य । घ॒र्मः । अ॒तिथिः॑ ॥
आ॒मासु॑ । प॒क्वम् । ऐ॒रयः॑ । एति॑ । सूर्य॑म् । रो॒हयः॑ । दि॒वि ॥
घ॒र्मम् । न । सा॒मन् । त॒पत॑ । सु॒वृक्ति॑भिरिति॑ सु॒वृक्ति॑ – भिः ।
जुष्ट॑म् । गि॒र्वण॑से । गि॒रः ॥ इन्द्र॑म् । इत् । गा॒थिनः॑ । बृ॒हत् ।
इन्द्र॑म् । अ॒र्केभिः॑ । अ॒र्किणः॑ ॥ इन्द्र॑म् । वा॒णीः । अ॒नूष॑त ॥
गाय॑न्ति । त्वा । गा॒यत्रि॑णः । 47 (50)

TS 1.6.12.3

ऽर्च॑न्त्य॒र्क-म॒र्किणः॑ ।
ब्र॒ह्माण॑स्त्वा श॒तक्र॑त॒वुद्ध॑-श-मि॒व येमि॑रे ॥
अ॒हो॒मुचे॒ प्र भ॑रे॒मा म॑नी॒षा-मो॑षिष्ठ॒दाव॑न्ने सु॒मतिं॑ गृ॒णानाः॑ ।

इ॒दमिन्द्र॑ प्र॒ति ह॒व्यं गृ॒भाय॑ स॒त्याः स॒न्तु यज॑मानस्य॒ कामाः॑ ॥

वि॒वेष॑ यन्मा॒ धिष॑णा ज॒जान॑ स्तवै॒ पुरा॑ पा॒र्यादिन्द्र॑-म॒हः ।

अ॒ह॒सो यत्र॑ पी॒पर॑द्-यथा॒ नो ना॒वेव॑ या॒न्तमु॑भये॒ हव॑न्ते ॥

प्र॒ सम्राजं॑ प्रथम-म॒द्ध्वरा॑णा - [] 48

TS 1.6.12.3 (Padam)

अ॒र्चन्ति॑ । अ॒र्कम् । अ॒र्किणः॑ ॥ ब्र॒ह्माणः॑ । त्वा ।

श॒त॒क्र॒त॒वि॒ति श॒त - क्र॒तो । उ॒दि॒ति । व॒श॒म् । इ॒व । ये॒मि॒रे ॥

अ॒हो॒मु॒च इ॒त्य॒हः - मु॒चै । प्रे॒ति । भ॒रे॒म । म॒नी॒षाम् ।

ओ॒षि॒ष्ठ॒दा॒व्. न्न॒ इ॒त्यो॒षि॒ष्ठ - दा॒व्. न्नै । सु॒म॒ति॒मि॒ति सु - म॒तिम् ।

गृ॒णा॒नाः ॥ इ॒दम् । इ॒न्द्र । प्र॒ती॒ति । ह॒व्यम् । गृ॒भा॒य । स॒त्याः ।

स॒न्तु । यज॑मानस्य॒ कामाः॑ ॥ वि॒वेष॑ । यत् । मा । धि॒षणा॑ ।

ज॒जान॑ । स्तवै॒ पुरा॑ । पा॒र्यात् । इ॒न्द्रम् । अ॒हः ॥ अ॒ह॒सः ।

यत्र॑ । पी॒पर॑त् । यथा॒ नः । ना॒वा । इ॒व । या॒न्तम् । उ॒भये॑ । ह॒व॒न्ते ॥

प्रे॒ति । स॒म्राज॑मि॒ति सं - रा॒जम् । प्र॒थ॒मम् । अ॒द्ध्व॒रा॒णाम् । 48 (50)

TS 1.6.12.4

–म॒हो॒मु॒चं॑ वृ॒षभं॑ य॒ज्ञिया॑नां ।

अपां॑ नपा॒तम॑श्चि॒ना ह॑यन्त॒–म॒स्मिन् न॑र इन्द्रि॒यं ध॑त्तमो॒जः ॥

वि न॑ इन्द्र॒ मृ॒धो ज॑हि नी॒चा य॑च्छ पृ॒तन्य॑तः ।

अ॒ध॒स्पदं॑ तमीं॑ कृ॒धि यो अ॒स्मा॒ अभि॑दा॒सति॑ ॥

इन्द्र॑ क्ष॒त्रम॑भि॒ वाम॑मो॒जो ऽजा॑यथा वृ॒षभ॑ चर्ष॒णीनां॑ ।

अपा॑नु॒दो जन॑–ममि॒त्रय॑न्त॒–मु॒रुं दे॒वेभ्यो॑ अ॒कृ॒णो–रु॒ लोकं॑ ॥

मृ॒गो न॑ भी॒मः कु॑च॒रो गि॒रि॒ष्ठाः प॑रा॒वत॒ – [] 49

TS 1.6.12.4 (Padam)

अ॒हो॒मु॒चमि॒त्य॒हः॑ – मु॒चम् । वृ॒षभम् । य॒ज्ञिया॑नाम् ॥ अ॒पाम् ।

नपा॑तम् । अ॒श्चि॒ना । ह॑यन्तम् । अ॒स्मिन् । न॒रः । इन्द्रि॒यम् । ध॑त्तम् ।

ओ॒जः ॥ वी॑ति । नः । इन्द्र॑ । मृ॒धः । ज॑हि । नी॒चा । य॑च्छ ।

पृ॒तन्य॑तः ॥ अ॒ध॒स्पदमि॒त्य॒धः॑ – प॒दम् । तम् । ई॒म् । कृ॒धि ।

यः । अ॒स्मान् । अ॒भि॒दा॒सती॑त्य॒भि – दा॑सति ॥ इन्द्र॑ । क्ष॒त्रम् ।

अ॒भी॒ति । वा॒मम् । ओ॒जः । अ॒जा॒यथाः । वृ॒षभ॑ । चर्ष॒णीनाम्॑ ॥

अपे॑ति । अ॒नु॒दः । जन॑म् । अ॒मि॒त्रय॑न्तमि॒त्य॒मि॒त्र – य॑न्तम् । उ॒रुम् ।

दे॒वेभ्यः॑ । अ॒कृ॒णोः॑ । उ॒ । लो॒कम् ॥ मृ॒गः । न । भी॒मः । कु॒चरः॑ ।
गि॒रि॒ष्ठा इति॑ गि॒रि – स्थाः॑ । प॒राव॒त इति॑ प॒रा – व॒तः । 49 (50)

TS 1.6.12.5

आ ज॒गामा॑ पर॒स्याः ।

सृ॒कꣳ सꣳशाय॑ प॒विमि॑न्द्र ति॒ग्मं वि॑ श॒त्रून् ता॒ढि वि॑ मृ॒धो नु॒दस्व ॥

वि श॒त्रून् वि॑ मृ॒धो नु॒द वि॒वृ॒त्रस्य॑ ह॒नू रु॒ज ।

वि म॒न्युमि॑न्द्र भा॒मितो॑ ऽमि॒त्रस्या॑भि॒दास॑तः ॥

त्रा॒ता॒र-मि॑न्द्र-मवि॒ता॒र-मि॑न्द्रꣳ ह॒वेह॑वे सु॒हवꣳ शू॒रमि॑न्द्रं ॥

हु॒वे नु॑ श॒क्रं पु॒रुहू॑तमि॒न्द्रꣳ स्व॒स्ति नो॑ म॒घवा॑ धा॒त्वमि॑न्द्रः ॥

मा ते॑ अ॒स्याꣳ – [] 50

TS 1.6.12.5 (Padam)

एति॑ । ज॒गाम॑ । पर॒स्याः ॥ सृ॒कम् । सꣳशाये॑ति सं-शाय॑ । प॒विम् ।

इ॒न्द्र । ति॒ग्मम् । वी॒ति । श॒त्रून् । ता॒ढि । वी॒ति । मृ॒धः । नु॒दस्व ॥

वी॒ति । श॒त्रून् । वी॒ति । मृ॒धः । नु॒द । वी॒ति । वृ॒त्रस्य॑ ।

ह॒नू इति॑ । रु॒ज ॥ वी॒ति । म॒न्युम् । इ॒न्द्र । भा॒मितः॑ । अ॒मि॒त्रस्य॑ ।

अ॒भि॒दास॑त इत्य॑भि – दा॒सतः॑ ॥ त्रा॒ता॒रम् । इ॒न्द्रम् । अ॒वि॒ता॒रम् ॥

इन्द्रम् । हवे॑हव॒ इति॑ हवे॑ – हवे॑ । सु॒हव॒मिति॑ सु – हव॑म् ।
शूरम् । इन्द्रम् ॥ हुवे॑ । नु । शक्रम् । पु॒रु॒हू॒तमिति॑ पुरु – हू॒तम् ।
इन्द्रम् । स्व॒स्ति । नः । म॒घवे॑ति॑ म॒घ – वा । धा॒तु । इन्द्रः॑ ॥ मा ।

ते । अ॒स्याम् । 50 (50)

TS 1.6.12.6

सह॑सा॒वन् परि॑ष्ठाव॒घाय॑ भूम॑ हरि॒वः परा॑दै ।
त्राय॑स्व नो ऽवृ॒केभि॑-र्वरू॒थैस्तव॑ प्रि॒यासः॑ सू॒रिषु॑ स्याम ॥
अन॑वस्ते रथ॒मश्वा॑य तक्षन्-त्व॒ष्टा वज्रं॑ पु॒रु॒हू॒त द्यु॒मन्तं॑ ॥
ब्र॒ह्माण॑ इन्द्रं॑ मह॒यन्तो॑ अ॒र्कैरव॑र्द्धयन्नहये॒ हन्त॒वा उ ॥
वृ॒ष्णे यत् ते॒ वृ॒षणो॑ अ॒र्कम॑र्चानिन्द्र॒ ग्रावा॑णो अ॒दितिः॑ स॒जोषाः॑ ॥
अ॒नश्वा॑सो ये प॒वयो॑ ऽर॒था इन्द्रे॑षिता अ॒भ्यव॑र्तन्त दस्यून् ॥ 51

TS 1.6.12.6 (Padam)

सह॑सा॒वन्निति॑ सह॒सा – व॒न् । परि॑ष्टौ । अ॒घाय॑ । भू॒म । हरि॒व इति॑
हरि॑ – वः । प॒रादा॑ इति॑ प॒रा – दै ॥ त्राय॑स्व । नः । अ॒वृ॒केभिः॑ ।
वरू॒थैः । तव॑ । प्रि॒यासः॑ । सू॒रिषु॑ । स्या॒म ॥ अन॑वः । ते । रथ॑म् ।
अ॒श्वाय॑ । तक्ष॑न् । त्व॒ष्टा । वज्र॑म् । पु॒रु॒हू॒तेति॑ पुरु – हू॒त ।

पद पाठे (वाक्य सहित) – प्रथमकाण्डे – षष्ठः प्रश्नः

द्यु॑मन्त॒मिति॑ द्यु॑ – मन्त॒म् ॥ ब्र॒ह्मा॒णः । इन्द्र॑म् । म॒हय॑न्तः । अ॒र्कैः ।
अव॑र्धयन् । अ॒हये॑ । हन्त॒वै । उ॒ ॥ वृ॒ष्णो॑ । यत् । ते॒ । वृ॒षणः॑ ।
अ॒र्कम् । अ॒र्चान् । इन्द्र॑ । ग्रा॒वा॒णः । अ॒दि॒तिः । स॒जोषा॑ इति॑
स – जोषाः॑ ॥ अ॒नश्वा॑सः । ये॒ । प॒वयः॑ । अ॒रथाः॑ ।
इन्द्रे॑षिता इतीन्द्र॑ – इ॒षिताः॑ । अ॒भ्यव॑र्तन्तेत्यभि॑ – अ॒वर्त॑न्त ।
दस्यून् ॥ 51 (48) (वृ॒त्रह॑त्ये॒ऽनु॑-गा॒य॒त्रि॒णो॑-ऽध्व॒राणां॑-प॒रा॒वतो॑-
ऽस्या॑-म॒ष्टाच॑त्वारि॒ंश॒च्य) (A12)

=====

पद पाठे (वाक्य सहित) – प्रथमकाण्डे – षष्ठः प्रश्नः

Prasna Korvai with starting Padams of 1 to 12 Anuvaakams :-

(सन्त्वा॑ सिञ्चामि॑-ध्रु॒वो॑-ऽस्य॒ग्निर्मा॑-बर्॒हिषो॑ऽह-मा॒प्याय॑ता-
मग॑न्म-यथा॒ वै-यो॒ वै श्र॒द्धां- प्र॒जाप॑तिर्य॒ज्ञान्-ध्रु॒वोऽसी॑त्याह-यो॒ वै
सप्त॑दश-मिन्द्रं॑ वो॒-द्वाद॑श ।)

Korvai with starting Padams of 1, 11, 21 Series of Panchaatis :-

(सन्त्वा॑-बर्॒हिषो॑ऽहं-यथा॒ वा-ए॒वं वि॒द्वा-ञ्छ्रौष॑ट्-साह॒साव-
त्रेक॑पञ्चाशत् ।)

First and Last Padam of Sixth Prasnam:-

(सन्त्वा॑ सिञ्चामि॑ – दस्यून् ।)

॥ हरिः ओं ॥

॥ कृष्ण यजुर्वेदीय तैत्तिरीय संहिता पद पाठे प्रथमकाण्डे षष्ठः

प्रश्नः समाप्तः ॥

Summary breakup of Padam - in Kaandam 1, Prasnam 6

| Particulars | | Example (in Pada PaaTam) | No. of Padams as per Pada PaaTam |
|----------------------|-----|--|----------------------------------|
| सामान्य पदानि | Ord | इषे । त्वा । ऊर्जे । | 1941 |
| उपसर्ग पदानि | PRE | एति = (आ+इति) । उपेति = (उप+इति) । प्रेति = (प्र+इति) । | 144 |
| वेष्टन पदानि | PS | उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) । | 416 |
| प्रग्रह पदानि | PG | ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति । | 6 |
| प्रग्रह वेष्टन पदानि | PGS | अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री | 2 |
| Total Padams | | | 2509 |

Details of Panchati and Padam for Kandam 1,Prasanam 6 (TS 1.6)

| | Panchati | Padams |
|-------------|----------|--------|
| Anuvakam 1 | 3 | 133 |
| Anuvakam 2 | 4 | 186 |
| Anuvakam 3 | 3 | 156 |
| Anuvakam 4 | 4 | 194 |
| Anuvakam 5 | 2 | 129 |
| Anuvakam 6 | 4 | 185 |
| Anuvakam 7 | 4 | 203 |
| Anuvakam 8 | 4 | 211 |
| Anuvakam 9 | 4 | 190 |
| Anuvakam 10 | 6 | 286 |
| Anuvakam 11 | 7 | 338 |
| Anuvakam 12 | 6 | 298 |
| Total → | 51 | 2509 |

(To download our vedic compilations please visit www.vedavms.in)